

DE IVRE ET
PRÆSTANTIA CHY-
MICORVM MEDICAMEN-
TORVM

Dialogus apologeticus:

AVTHORE
Thoma Mufetto Londinate Anglo.

ACCESSERVNT ETIAM EPI-
*stole quedam medicinales ad medicos
aliquot conscriptæ.*



FRANCOFVRTI
Apud hæredes Andreæ Wecheli,
MDLXXXIIII.

12-14-18

THE ATTORNEY GENERAL

WASHINGTON

DEPARTMENT OF JUSTICE

RECEIVED

NOV 14 1888

WASHINGTON



RECEIVED



EXCELLENT^{mo} VIRO
 PETRO SEVERINO DANO
 SERENISS. REGIS DANIÆ
 ARCHIATRO

Thomas Mufettus Anglus

U. r. e. g. i. s.



QUANDIV Philochemiæ ani-
 mum adieci, ornatissime Se-
 uerine; tandiu eius præstan-
 tiam singulis Medicinæ stu-
 diosis innotescere posse, plu-
 rimum peroptaui. quippe ex qua tantam
 sanitatē suauitatemq; hausi, quantam non
 optare alijs communem, vix hominis, né-
 dum philosophi esse existimarem. Tamen
 cum cernerem tuā illam ingeniosissimam
 & cedro dignissimam Idæam à vulgo me-
 dicorū honore non satis amplo exceptam;
 teq; & oleum (quo saxa mollire instituisti)
 & operam pænè omnem perdidisse: vere-
 bar equidem ne cum hoc libello iniquiùs

multo essent acturi, qui tam elegantis & diuine orationis θαλίτρω neutiquam flectebatur. Fortè id accidit, quòd Antichymistas siccos & sobrios esse credēs; propterea eos putares non sale sed oleo perlucendos, & molli oratione ceu pleetro quodam Thebaico ad veritatis sensum ducendos. Ego autē contra animatus sum, in eamq; totus ab eo sententiā: quòd nō oleo amplius perlucēdi, sed sale perfricandi sint, & vel satyricorum cauterio vel stimulis dialecticorum exuscitandi. Nam illorum plurimi Chymiā tanto odio habere cœperūt, ut ipsius solo nomine audito inhorrescant, & (qua sunt fatui mentis intemperantia) subinde vomere cogātur. Alij verò Chymica vehemēter laudant remedia; sed quoties sua ipsorum negligentia Vulcanus vitium admisit, toties artem dentuò lacefunt, vel traducunt demonstratorem. Neque omnino minimus eorum numerus prodit, qui Chymico omnē eò vsq; deferunt honorem, quò vsq; sese extra metallicam mineralemue prouinciam exercet: nam ab illis maiori religione, atq; à ceraste aut vipera abstinēdum cēscent. sed qua
rationis

rationis vmbra id faciant, nequeo satis assequi. Nam si venenum illorū detestantur, quid viperam adhibent? qua neq; leprosius animal, nec minerale tam noxium reperitur. Adde insuper, tantā inter homines atq; serpentes inditam à Deo esse *ἀντιπάθειαν*, quātam inter ipsum atq; mineralia nunquam videris: adeoq; tantam, vt illorum solo vultu, tanquam humani generis perduelle quodā cōspecto toti contremiscamus. Deinde cum sal mineralis non solum in omni vegetabili quo alimur aut alteramur, sed etiam in quoq; animali reperitur: profectò aut nihil præbere egrotis necessum est, aut ad mineralium vsum quāuis reluctante animo accedere. Præterea cum à Deo hunc ordinem sublunaris liturgiæ præscriptū esse sciamus; vt mineralia vegetabilibus, hæc brutis, brutaq; hominibus alimentū suppeditarēt: quanta (Deus bone) stupiditas, quæ nos ignorantia effascinat, ne maximā inter homines & mineralia similitudinem confiteamur? Rectiùs mea quidem sententia ille, qui hominē Microcosmū vocauit: vtpote in cuius natura, Dei, Angelorum, bru-

torum, plantarum, diaboli, totius deniq;
 vniuersi aliquid collocatum sit. nec sanè
 immeritò. nam re vera quantum in nobis
 virtutis habitat, tantum Dei inest: quātum
 sceleris, tantū diaboli: quantum rationis,
 tantū Angelorum: quantū motus sensusq;
 arbitrij, tantum bruti: quantum auctio-
 nis, tantum plantæ: quantum salis, sulphu-
 ris, mercurij, tantum mineralium. Factus
 enim est homo, vt cetera quæque mixta,
 ex minera terræ; & in suum omnia pulue-
 rem post factam corporis analysin, ocius
 tardiùs redibunt. Verùm quid ego hasce
 noctuas ad te, qui Athenis trāsigis etatem?
 vel quid ad illos Misosophos, qui senum
 psittacorū more negligūt erudientē, nec
 vnquā è suis monstrorū plenis labyrin-
 this, vel Ariadnes filo adiuti egrediētur?
 Placuit tamen aliquid tentare ad ipsos re-
 uocādos, si non proficiendi spe, tamen pe-
 riclitādi volūtate: quādoquidem ἐς Τροίην
 πειράμενοι ἦλθον Ἀχαιοί· Καλλίσα πάδων
 πείρα θνὺ πᾶντα τελεῖται. Cur autē hec ti-
 bi nostri exercitus præludia dicarē, pluri-
 ma in causa sunt. Primū singularis tua erga
 nostrates humanitas, quā ante biēnium in

tua

tua patria & nostro illustris. legato, Peregrino Bertio, nobilissimæ ducis Suffolciæ filio, mihiq̃ue in primis neque modio neque trimodio, sed ipso pleno horreo aperuisti. Deinde verò, quòd medicā ὁμοθεσιν hominibus medicinæ imperitis (quales plerique nobiles & senatores sunt) ascribere, perinde esse videtur; ac si agricolæ Monarchiæ encomium, aut militi agriculturæ scientiam offerres. Sed illa in primis me mouit (optime Seuerine) tuæ singularis doctrinæ & exploratæ hac in causa eruditionis contemplatio: cuius sola umbra refocillatus mihi facilè persuadeo, me de cunctis chymicorum remediorum conuitiatoribus verè atque solidè triumphaturum. Hanc autem Apologiam anno superiore accepisses, nisi tuam illam aduersus Antiparacelsitam auream responsionem in dies expectassem. Verùm cum te aut seculi ingratitude, aut silentii iucunditate, aut regiis auocatum negotiis auxiliares chemiæ copias nondum misisse scirè: officii mei effeduxi Miso-chymicos sublimes interim arripere, suamq̃ ipsorū ὁμοκαρδίας hac prima velitatione ceu pa-

sterculi vnius fundula prostertere. Quod si aliquæ eius fortè reliquie reuixerint, dabis spero operâ, vt tuis cõiunctis copiis nostræ augeatur vires, αὐτὲ δὲ ἐρχομένων singula huius hydræ capita amputentur. Victoriæ autē spem illud omniū maximè facere nobis videtur, quod neminē huic causæ reluctantē legere possimus, quin idē aut Babylonice bestię nomē dedeſſet, aut se disciplinæ diuinæ & perfectæ ecclesiæ repurgandæ ἡ λάβρα ἡ ἀμφαδὼν ostēderit inimicū. Interim verò, dū tua instruitur acies, si mihi in hac prima dimicatione βελάσων τε θυμὸς videatur λεπὴν δὲ τε μήπις; id velim nō nostræ pusillanimitati; sed tuarū copiarū expectationi feras acceptū. Nec tamē tam excordes vnquā reperiemur, quin denuò in hostē rediuiuis viribus, quando cūq; occasio tulerit, reuertamur. Bene vale, meq; (vti soles) perdilige. Nobiliss. Regis Gall. legato, D. Tychoni Brahe, viris vt Chemie, sic etiā virtutis studiosissimis, salutē ex me dicas amplissimam, etiā atq; etiam te rogo. Datæ Londino Prid. Kal. Feb. 1584.

Tuæ felicitatis studiosissimus

THO. MVFETTUS.

PV-

PVR AE SIVE CHY- MICÆ MEDICINÆ STUDIO SIS

Thomas Mufettus Medicus S.

VERVVM illud esse experior Comici
non inscitū dictum, charissimi fra-
tres: Sapientem ad res agendas his
tribus impelli, Neceſſitate, Lege,
Consuetudine. Absque quibus fuisset, equidem
non solum ab hoc genere ſcriptionis, sed ab o-
mni librorū meorū euulgatione abſtinuiſſem.
Video enim eam cuiq; patere ad operū ſuorum
impreſſionem facilitatem, vt impudiciſſima
Venus, & ſtultiſſima quavis opinio ſuum quoq;
prælum conſecuta ſit. Tamen cum neceſſum ſit
ſcriptis animare vos, quos vna oratione attin-
gere non licet: neceſſitati dabitur (ni fallor) ve-
nia, nobisq; non ſcripturiendi ſtudio, ſed ani-
mus veritatem docendi imputabitur. Præter
ea Natura vitæq; breuitate monemur, ſcien-
das vel citò vel ſerò eſſe arbores, quæ proſint fu-
turo ſeculo; hominemq; vt ad ciuilem vitam,
ſic etiam ad eorum quæ à Deo optimo maximo
accepit cum alijs diſtributionem procreatum.
Quin porro de Zuingero, Aragoſio, Senerino,
alijsq; inſtitutoribus meis per optimis (quos

ἵστα γενέτησιν ἡγήσασθαι Hippocrates iubet) pa-
 rum honorificè sentire videar, si chymica ipso-
 rum remedia (quibus unicè delectatur) varijs
 criminationibus à viris impudētibus cōspersa,
 cōtra quemcūq; hostem liberè propugnare non
 ausim, eorūq; innocentiam, immunitatem, ius
 nervis modisq; omnibus sartū tectum servare.
 Nec sola ipsoꝝ gratia hac facerē (hominū quip-
 pe auctoritate in Physica disceptatione uti
 planè ἀποπρον videtur) nisi quoq; re ipsa cernerē
 medicos chymicis destitutos remedijs similes es-
 se fabrorum, qui ad secandū hebetem securim,
 vel fortè medio confractam adhibēt. Deniq;
 cum consuetum esse videā praeclatissimis viris,
 omnem inire rationem, qua ab se non tantum
 crimen sed etiā criminationē segregēt; suamq;
 innocentiam cum verbis tum scripto agant apud
 populum: nihil novi aut mali facturum
 memet cōfido, si illata repellēdo tela, futura ar-
 ceam; hosq; delirantes nepotulos ad meliorem
 (pro viribus) frugem reuocare velim. Nunc
 enim nescio quo superbiae astro perciti in conui-
 tiando modum tenere nequeūt, deq; illius An-
 tiparacelsistae libris, tanquam de Metelli spo-
 lijs in omni mensa triumphant. Tamen si per-
 spicerent miselli, quàm parum virium illius
 acies

acies obtinet, suaq; ipsius argumenta in veritatis, Iustitia, atq; AEQUALITATIS statera examina-
rent: sanè non minore celeritate ab eius vexillo, quàm Mars ille velocissimus Deorum à Veneris amplexu toroq; adulterino, postquàm se dijs hominibusq; ludibrio exposuisset, aufugerent. Etenim prima parte quid aliud nobis ostendit, nisi magnā Theophrasti impietatem? quam sanè ut Theologi accuratius, sic etiam iustius tractassent. Nam quod medicorum est, id curent medici; tractent fabrilis fabri. ipse etiā homo cum sit, in hominem equiùs affici debebat: vel saltem non ita humanitatem deposuisse, ut iugulare mortuos & in defunctos seuire habeat oblectamento. Quid si Paracelsus in Mundi creatione diuināq; administratione aliquid à sacris literis alienum sensit? ecquid in eo ab Ethnicis differebat scriptoribus? vel cur non pari misericordia illius ferimus figmenta, atque disciplina ecclesiastica osoribus (quorum nō se minimum esse prodidit Antiparacelsista) vel Galenica impietati condonamus? verū cū illū καὶ παντός, καὶ αὐτὸ, καὶ πολλοῦ παῖτος, ipsamq; humanitatis legem transiluisse abundè constet: nolo hunc limum amplius mouere, ne vobis (quibus semper placere institui) ingratif-

*simum excitem odorem, meq; ipsum ad maiora
 festinantem impediam. Noui Antichymistas
 etiam à nemine oppugnatos, unà cum illo Ido-
 lolatrarum Deo mole ruituros sua, iamq; diu-
 turno spontim furoris astu cōtabuisse. Tamen
 cū me sciuerint non tam cruciandi animo &
 expectatione triumphiquàm ipsorum sanitatis
 gratia hunc libellum quasi cauterium aliquod
 emisisse: meum (ut spero) institutū magnopere
 laudabunt, neq; adeo damnabunt voluntatem.
 quis enim Medicum apoplecticos vel pungētem
 vel vrentem vel etiam flagris cadentem, tan-
 quam ἀφελαιστικὸς reum insimulabit; cū
 hac ille non ut affligat agrum, sed sensus reuo-
 candi ergo usurpat? Reliquū, animuli mei, ni-
 hiliam videtur: nisi ut quas vobis distribuēte
 iustitia possessiones emensus sum, eas nec pretio
 eni, nec sycophantijs surripi, nec vestra pusilla-
 nimitate auferri unquam permittatis. Deus
 optimus maximus vestra promoueat studia,
 atq; hac summa tranquillitatis Alcedonia ad
 Ecclesiam nostrā medicinamq; perfectē
 repurgandam, quā diutissimē
 velit largiri. ἀμὲν.
 καὶ καὶ ἀμὲν.*



DE IVRE ET

PRÆSTANTIA CHY-

MICORVM MEDICA-

MENTORVM,

Dialogus Apologeticus.

PHILERASTVS. CHYMISTA.



PER VI-præceptori meo cō-
siliū meū de fallendo Chy-
mista laudat, commendat,
prædicat, votis etiā promo-
uet hoc opus, meque vario-
telorum genere & technarum multitudine instruxit. Tamen, ne mentiar, cum a-
pro Ætolicō, cum vrsō, leone, excetra cet-
tare mauelim, quā cū chymistis: qui al-
loquentem teterrimo sulphuris odore, aut
mercurialibus fumis totum obruūt. Au-
dio etiā quendam chymistam haud longē
hinc commorari, qui nos Galenistas ceu

haleces sale conditurus est, & postea in fumo suspensurus. Pol, nisi me signum fallit, hic habitat in vicinia. sed ecce hominem egredientem. Audite cœlū & terra, dum Dædaleos cōminiscar dolos, totāq; huius periclam noua simulatione perdiscam.

CH. Phy. aut catum siluestrem, aut mustelam hac transisse arbitror; ita olet male.

PH. Adibo? sistā. sistā? immò certa est mēs. querā, quò quò hinc remotus est gentiū.

CH. Salue aduenā. PH. Et tu inquiline, salue.

CH. Quem tam sollicitè quæris, hospes? ei si quid ego adiuuēto sim inueniēdo, impera. PH. Pol humanitatē tuam accipio, & in patriā denuò reuersus ipsam prædicabo lubens. Chymistā quæro. cui inueniendo quantam mea gratia operam dederis, tantum te semper arctiùs amaue- ro; & prima occasione oblata reddā mu- tuum.

CH. Tametsi tātò vix quispiam no- mine dignus sit, nihilominus me ita à po- pulo vocari, nolo ire inficias. PH. O me fe- licē Philerastum, qui in ipso portu merces video desideratas. Quis aut qualis Deus cuiquam similē opportunitatem? mi here, mi patrone, mi pater optatissime, salue.

CH.

CH. Nugas agis, Phileraſte. neq; enim me tibi herū, vel te mihi ſeruum fuiſſe, vnquā memini. ſed vnde ſoluis, obſecro? qua patria oriūdus es? PH. Athenis Galenicis ſolui. patriam Germaniā habeo. CH. Quid igitur huc aditio fuit, hoſpes? cur me deridiculi cauſa ſalutas? Quid Athenis Galenicis valedicēs huc appuliſti? PH. Quoniam vbi nihil præter morum corruptelam, ſcientiæ inopiam, loculorum exenterationem video, ibi ſi ſceptrum detur, non eſt cupita manſio. CH. Bona verba quæſo. vix ſentio taliū operarū viros eſſe Atheniēſes. quod ſi tales fuerint, merito auſugis, rectēque facis aduena, quòd ab eorū conſortio accuratè abſtines. PH. Immò tota Athenienſium atq; Galenicorum gens eſt inter homines mea quidē ſententia, vt Napelli, Aconita, Chamæleontes. coloris ſplendorisve elegātia oculos atq; animos paſcunt, bono tamen vſui ſunt nulli. CH. Tace, obſecro. ſi quid Galenici Ethices præcepta tranſgrediātur, id Theologi reprehēdant velim, Politici puniāt. Tuū verò eſt, medicus cum ſis, illorum in medicina errores arguere; nam in alienam prouinciā ex-

currere quàm parū Dialectici sit, lex illa Iustitiæ καὶ αὐτὸ satis conuincit. Sed dic mihi tua fide, hospes: Nunquid Galenicōs in æternū deseruisti? an meos degustatum sermones, & arcana surreptum venis? PH. Egōne tua tibi arcana surreptum veni? minime possem: vel etiā si possem maximè, pietas prohibet. CH. Tamen tuorū multī huc veniūt, & me salutant blanditer: commiter appellant: rogant, vt sustentatū est: meamq; & operā & artē diuinis affectam laudibus suspiciunt. cum verò in scholam redierint, stomachum detegunt, & in chemiæ fautores liberè vel potius illiberaliter debacchantur. Alij itidem sunt ita: Chemiam amant, quantum in rem esse ducunt suam; quando autē sumptus requirit, tum ceu scientiam inutilem reiiciūt. PH. Atqui ego illam ita amplector atq; amo vnicè, vtī amare æquū est: nihilq; mihi tantū est reliquū, quin Chemiæ discendę nō mine illud inducar dare. Est enim Chemia solidę philosophiæ fons, clauis sapientiæ, anima & medulla physices, medicinæ radix, & meta in quam viri sapientes collimarūt. vis magis prædicem? CH. Immo satis

fatis superq̃; aduena. mallet enim ab ipso
laudari chemiã, qui ipſus in laude ſemper
vixerat. Gaudeo tamen eò vſq̃; præualu-
iſſe eam, vt ſuum quoq̃; encomium ex ore
inimicorum cōſecuta ſit. ſed reſpōde pau-
cis; cur chemiæ nomē daturus venis, cū
eam tot egregij medicorum principes re-
pudiarint? nam ex Græcis, Hippocrates;
Polybus, Ariſtoteles, Nicomachus, Theo-
phraſtus Leſbius, Herophilus; Serapion;
Dioſcorides, Galenus, Theſſalus, Trallia-
nus, Archigenes, Ruſſus Ephēſius, Aëtius;
Oribasius, Alexander Trallianus, Paulus
Æginetã; Actuarius, veſtri ſunt. Veſtri
quoque, Auenzoar, Alubeter, Iſaac Bei-
miram, Albaterius, Albucasi, Iacobus Al-
kindus, Auicenna, Auerrhois, Ioamitius;
&c. inter Arabas. Ad vos etiã ſpectãt o-
mnestum Itali, tum Hiſpani, tum Galli;
tum Gerinani & Angli, qui ante annos tre-
centos medicinam exercuerunt. Cum i-
gitur tot præclari artis medicę Atlantes ſe-
nectute canisq̃; conſiti noſtram oppu-
gnarint vel ſaltē nō cognouerint ſciētiam;
inanem ludis operam, adoleſcens, qui huc
illius perdiscendæ gratia nullum non ma-

risterræq; periculū subijsti. PH. At didi-
 ci non ætate sed ingenio cognitionem ac-
 quirī, eamq; in rebus plerisq; pessimā esse
 video opinionem, in qua maior numerus
 consentit. Nam, Deus bone, quantum &
 quā grauium hominum conciliū Chri-
 stum illum Protophilosophū falsis crimi-
 nationibus & opprobrijs affectū deprōsit
 postea ad flagrum, nec non nisi vilissima
 crucis morte occisum demisit! Quod si il-
 lū in carne patefactū, annorum, prophe-
 tiarum, miraculorum testimonio vel cæcis
 & lippiētibus ostensum, oculati illi Patres
 nostriq; in primis Patroni nō agnouerunt:
 multo quidem facilius in ipsis medicinæ
 principiis errare potuissent, nobisq; ali-
 quam eius partē vel rudē vel incognitam
 relinquere. Siccine medicinam omnem
 in Idololatrarum pectore, aut vnus Gale-
 ni fonte clausam fuisse verisimile est: vt
 Christianis necessitatē imponamus, eam
 vel ab Ethnicorum ore vel à nullo omni-
 no latice hauriēdi? Quin potius illud con-
 stantissimè teneamus *ἁγίασμα*: Christi pro-
 fessionē ad omnia vtilem, omniumq; pro-
 missionū energiam ad cō percipere; vt qui
 ipsum sincerè colit, maius propterea in sua

vocatione siue medica siue physica sum-
pserit incrementū. Præterea sicuti Chri-
stus ipse (quē ecclesiæ caput agnoscimus)
omnis disciplinæ inter homines fuit (pro-
cul dubio) peritissimus; ita etiam vt Chri-
stiani eo ipso cunctos Ethnicos antecant,
non similitudinis tantum ratio atq; Caba-
listica anagoge, sed physicæ æquitatis lex
imperat. Testor Salomonem, Apostolos;
eorumq; discipulos omnes, nec non huius
ætatis medicos nonnullos, qui diuino affla-
ti spiritu tum scientia tum vñu medicinæ Iu-
dæos, Græcos, Arabas; Latinos, superarunt.
Nam in Anatomia totius medicinæ vesti-
bulo quàm perniciosi veterum lapsus fu-
erunt? quàm falsa ipsorum physice, & non
solum à diuinis litteris, sed quoq; ab ipsis
sensibus abhorrēs? Methodū verò ita pœ-
nè omnes ignorarunt, vt qua potissimum
methodo medicus opus haberet, pauci, im-
mò vix aliqui tenerent. Omnes deniq; in
medicamentorū præparatione à veritate
ad opinionē, à sensibus ad imaginationē;
ab apodixi ad errorē sensim delapsi sunt:
nec nunquā ante paucos annos ad sanam
mentem reuersi. CH. Næ quamuis Ga-

lenicis in usu esse solet, linguis ab animo differre, tamen tu tam cordatè loqueris, & mea quidè sententia diuinè: vt nihil in me claudi permittam, quod te scire interest.

PH. Tu si aliud mihi in ore esse perspexeris, aliud in pectore: nullam causam dico (Chymista) quin mihi & famæ, & salutis, & vitæ apud te deliquio sit. CH. Age. tuam experiar fidem, fretus ingenio tuo. fac igitur infidelior mihi ne fuas, quàm ego met sum tibi. PH. Immò nisi meis præcordijs malè velim, tibi volo optimè. & mihi ipsi citiùs infidus ero, quàm tibi desit fides. CH. Capió conditionē. sequerē me ad ædes. PH. Salue naturæ fantum! vt te expectauī diu. sed papæ! quàm exiguę sunt istę tuę ædiculæ? CH. Nec ingentes quoq; fornicæ; tamē naturæ solertiā artificiūq; magis, quàm proceras gigantum machinas commendant atque cōmemorant. PH. At quæ illæ obsecro litteræ, quæ præ ostio manēt insculptę? CH. BASILICA CHYMICORVM: CONTRA QVAM OMNES GALENISTARVM COLONIÆ NON PRÆVALEBUNT. PH. Rude quidem hospitium, & tanto ferendo nomini

minilōgè impar. neq; enim opere Corinthiaco vestiūtur parietes, nec extrà emblematis ornantur. desunt quoq; vestibulo Atlantes, & in tecto tegulæ deliciares desiderātur, neq; valuę Dędalea manu sculpuntur, ad Basilicę exemplar. CH. Tu exteriorem ædium ornatū expetis, hospes. cum ego data opera non addidi. Turpe enim existimo externum consecrari splendorem, ambitionis, non philosophiæ; stultitiæ, nō cognitionis argumentū. Quum etiā tuus Hippocrates nimiam in medicis damnet ἀξυεσίτω, frustrā mihi tegulas deliciares, opus Corinthiacum, aut Dędaleam manum narras, qui Anglus sum; & in ædificijs sobrietatem, quā nouā istam εἰκομαρία imitari mallet. Præterea edes tanto sumptu ornatæ, cū multorum Pharmacopœorū pyxidibus parissimę sunt: quę extrà auro radiant opereq; poliūtur Phrygio: intus autē vel nihil, aut sceleta tantūm cōtinent, & (adsit veriuerbio venia) cadauera medicamentorum. PH. Verum autumas. Noli autem grauitè quæ dixi ferre. nam nos artis præstantiam ex artificis diuitijs, supellectile, ornatu, elegantia, fa-

B iij



stuq; æstimare soliti sumus: parùm Natu-
 ræ memores, quã ingentẽ auri thesaurum
 in terra omnium ædium vilissima recon-
 dere animaduertimus. Ceterum nunc
 cortice satis conspecto, ad nucleum per-
 uenire fames est. CH. Ingredere igitur.
 Sed priusquam pergis, cedẽ in hoc apody-
 teriũ: atq; ibi credulitatẽ, postea socordi-
 am exue. PH. De socordia placet quod
 imperas, atq; sentio necessũ esse. Verũ
 credulitatẽ quisquis omnino omnẽ exu-
 erit, huic disciplinæ nõ altius imprimune
 vestigium, quàm triticum in mari satum.
 Nam iuxta illud Aristotelicum, *δὲ μὲν τὸν*
μαθητὰν ὡς πιστεύειν, vt discipulum habeas
 liberalẽ, modestũ, beneuolum, attentum,
 docilem, & instar luti in quãcunq; partem
 fingendum. CH. Immo intelligentia di-
 scipulum decet, credulitas nõ decet. Nam
 si huic te subieceris, Atheniẽsis: animę im-
 mortalitatẽ, Dei omnipotentiã, mũdi crea-
 tionẽ, omnemq; Christianorũ doctrinã,
 ad Galeni exemplũ, deridebis: nihilq; tam
 improbẽ ab ipso defensum est, quin tuo vi-
 cissim calculo confirmabitur. Quare nec
 mihi, nedũ cuipiã vlteriũ habeo fidem;
 quàm

quàm nos vel sensibus manifesta, vel rationi, vel diuinis litteris congrua dicemus.

PH. Probè mones. CH. Nunc in balneū descende, atq; ablue opinionē, pręuaricationem, fastū, & reliqua scientiarū impedimenta. PH. Factum puta. ecce iam

lotis auribus, & defecato ad te animo reuertor. Numquid pręterea vis? CH. Tātūm vt pileo mystico & toga bōbycina deposite amiculū chymicū induas: rudioris fortè texturæ, sed ad nostras operationes longè conuenientius. iam libri loco forcipem accipe dentatū: is tibi magister erit. optimè comparatus es. sic physicū ornari addecet. Sequere iā nūc me. PH. Proh

fidem. quas ego hīc cōspicio, quales, quot fornaces? quod obsecro huic loco nomen est? CH. Ποντήριον. PH. Durum verbum & asperum. CH. Tibi fortè quē hac-

tenus in hypocausto sedentem Galenus desidem reddidit. Verūm qui laborem & sudorem (quibus dij omnia vendere scribuntur) optatissimo cuiq; otio anteferunt, aliter animati sunt. PH. At profectò non vili pretio tantus vitrorū, valorum, & fornacū omniū delectus cōparatur. multum

quoq; pecuniæ absorbent Vulcanus, fermentum, argilla, & vehicula elicienda.

CH. Quasi verò illius apud Comicum dicti oblitus sis: Necessum est facere sumptū, qui quærit lucrum. nec tamen tanti erunt sumptus, quin à lucro millies superabūtur. Etenim pro pecunijs scientiam emes incomparabilē, totius Physices demonstratricem. nullus mercator tā felici commutatione, nullus danista tā fecundo fœnore est vsus. Noli igitur isto auaritię luto hērere: sed potius imitare Montanū, Ferneliū, Villanouanū, Fracastoriū, Cardanum, Gesnerum, Zuingnerū, Aragosiū, Brickmannū, Platerum, & aureum Daniæ pul- lum Seuerinum; quos factis in Græciā, Arabiam, omnemq; medicinæ veteris provinciam tam longis deuiationibus, nō pudebat huius artis esse *Quadrēs*, suāq; se- necluti huiusmodi laboratorīū, ceu monumentum quoddam honoratissimū extruere. PH. Memorabiles memoras viros, & huius seculi sola quædā ornāmēta: corūq; fretus auctoritate, auidissimè sitio chemiā. Soleo enim aliquid aggressurus primū disputare mecum, an id facere equū sit!

fit! deinde, an alij quoq; boni id fecerint ante me! quippe tum confirmatur electio nostra, cū sentimus prudētes clarissimosq; viros, qui ipsi in honore semper vixerant; idem velle nobiscum, idem agere. Ceterū hīc aqua mihi heret: An æquius fuerit tā paucorū hominū vestigijs insistere: An sequi veterū opiniones, qui in hac preparationū palēstra aut nulli, aut planē hospites videntur. Parce obsecro si nunc ad Galenicorū stationes recurrā; facio enim id non tā illorum amore aut victorię spe; quam sciendæ veritatis causa, atque vt omnem tibi credulitatē videar deposuisse.

CH. Laudo institutū: & vicissim respondeo tibi: veteres medicos in omnibus vel plurimis imitari perinde esse, ac si rudi quidem ab opere peteres exēplar. Erat enim medicina circa Hippocratis tempora instar fœtus recens concepti: in quo confusa tantum lineamenta, & rudes adumbratiunculæ membrorum conspiciebantur. Hanc postea Galenus methodo distinctiorem, posteritasq; tum Arabum tum Græcorum varia medicamentorum supellectile ab agyrtis & tōsoribus corrasa locu-

pletiozem fecerunt. Nullus tamen eò profecit, vt aquæ rosacæ destillandæ (ò præclaros medicinæ Architectos) vel teneret vel traderet rationem. Immò in nulla Medicinæ parte non turpissimū reliquerunt errorem, quem postea sapientior proles tanquam secunda sponsia absterfit. PH. Vera refers, & meo quidē iudicio vel sensibus ipsis palpāda. Nam sicuti aliter senes sentiūt, aliter pueri: hi rectè, illi pro ratione ætatis; ita quoque admirationem minimè promeretur. Nos in hac mundi veluti canitie, quædam inuenire patribus incognita, aut inuentis ipsorum Apellis manum inducere: quandoquidem ipsi non aliàs quàm per nubem Medicinam intuebātur, & vt tuorum verbū vsurpēm, nondum embryonata. Quare perinde atque Auicenna in Galeno veritatem, in Hippocrate Galenus diligentiam, Hippocrates in veteribus methodum desiderauit: ita etiā nihil in omnibus vel singulis scriptoribus expetere, serui moroso domino obstricti, non eruditi sciētix exploratoris nota est. Nunc autem (omissis veterum delictis) mihi fornacum nomina vsūque rogo

rogo explices. CH. Illa Neptunus, Mare, Maria, Zona temperata, hæc Venter equi: ista Gallinarum nidus vocatur. illic verò Ægyptus collocatur: à dextris Persia, Mauritania, Ætna, Serpens, Acediæ furnus, & venter struthiocameli. PH. Eheu! quæ dicis, cinerē quærere videtur. apage istam amphibologiam, qua mihi non erudire velle tyronem, sed fugare etiam prouectos apparent Chymistæ. CH. Verum hoc consultò faciūt, & magno iure. Nam vltra quod in nouis artibus *εγγραμματοποιεῖν* nulla vetat lex, Hippocratis etiam & æquitatis voce sancitur: res sacras profanis hominibus obscurè tradendas esse, *ἄριον ἢ τελεθῶσιν ἐργάοισιν ὀπισημῆς*. Adde insuper Naturam maiestatem suam arcano aucupari silentio, nobisque castaneæ nucleum non nisi cortice & aspero tegumēto abditum offerre. quamuis re ipsa nullum rebus nomen à Chymicis impositum esse affirmo, quod perfectæ Polygraphiæ, Etymologiæ, Notationis, Analogiæ, atque Physicæ anagoges scientia imbutus non prima quaque lectione intelligat. Tantū abest, vt meritiò elucidationem vocū desi-

derent, vel iure villo culpēt obscuritatem.
 PH. Non repugno. tamen meo quidem a-
 nimo in scientiis docendis ea solūm vti o-
 ratione, ad quam solus aliquis Cabalista
 tanquam natator Delius perueniat, non a-
 liud videtur esse, quā homines ad lau-
 tissimum prandium inuitatos & mox ac-
 cubituros laruis spectrisq; fictis expellere.
 verūm ad eorum medicamentorum præ-
 parationes videndas oculi mei festinant,
 quas ceteris omnibus præstatiores esse li-
 bri profitentur tui. CH. A desdum igitur,
 & in hunc zodiacum ingredere. PH. Ni-
 tidiorē locū non memini vidisse me.
 sed quā ob rem vocas Zodiacum? CH.
 Quia hīc animalium signaturæ non illæ i-
 maginariæ Astrologorum, sed veræ & vi-
 tales seruātur. volo enim duplicem inesse
 vitā animalibus; vnā quæ in se ipsis, alte-
 ram quæ in nobis operatur. prima euane-
 scēte, secūda obtinet imperium: nobisq;
 vel medicamētum præbet ad corporis al-
 terationem, vel ad eius nutritionem ali-
 mentum. PH. Verūm quandoquidem
 me credulū esse non vis, animalibus mor-
 tuis vitam inesse denego. nam pari ratione
 lapi-

lapidibus, metallis, atque astris inesse vitā nullo quis negotio probauerit, atque brutis animam exhalantibus. Ego verò triplicem solam vitam agnosco; Rationalem, Sensitiuam, Vegetatiuam: id quod non solum Aristoteles, sed quæuis Medicorum natio ante Paracelsum natum defendit.

CH. Atqui in eo turpiter hallucinaris, Atheniensis. Nam Galenus tuus Libro 9. de vitæ aut nihil præter vires esse meth.med. disertis verbis asserit, aut viriū actionem. Si igitur vis insit animalibus mortuis, metallis, astris, lapidibus: quidni & vitam inesse dixerimus? hæccine in Galeno ferenda opinio est, & damnanda in Paracelso? Nōne etiā Hippocr. in suis De diætā libris passim notauit, vitæ conseruationem per alimentum fieri, declarationem per operationes? sicuti igitur homo viuere dicitur, quandiu actiones homini prædestinatas edere queat; ita etiam quandiu Magnes ferrum, succinum paleas, Rhabarbarum bilem attrahit, tandiu vitam illis tribuere sobria atque sicca sententia censerī debet, non ebriosi hominis imaginatio. PH. Vitam igitur nihil aliud statuis, Chymista,

quàm cunctis rebus energiam ex diō⁹ in-
 fitā; id est hominis ad humanas actiones,
 Astrorum ad Astrales, Angelorū ad An-
 gelicas, brutorum ad brutales, plantarum
 ad plantares, mineralium ad minerales,
 metallorum ad metallicas, alimentorū ad
 alimentares, medicamentorum ad medi-
 cas operationes dispositionem. CH. Re-
 ctè colligis. & profectò cum mors nihil al-
 liud sit, nisi perpetua ab actionibus præor-
 dinatis cessatio: cur animalia prius omni-
 no mori fatebimur, quàm omni actione
 cuius gratia prædestinabātur spoliata sunt?

PH. Viuunt igitur animalia animā parti-
 cipātia sibi ipsis: hac verò destituta viuunt
 postea in nobis, & actiones proferūt ma-
 gneticas. nonne hoc vis? CH. Maximè.
 & propterea vitā splenis bouini dico, non
 solum quæ in corpore bouis attrahit, cōco-
 quit, expellit: sed etiam quæ in nobis expe-
 dit lienis obstructions, mēsesq; prouocat.
 sic etiā vita castoris testiculorum (quo ad
 nos) ea dicitur, quæ vteri suffocationibus,
 & morā facienti fœtui medetur. sic etiam
 sales atq; olea cranei humani, alces, vipe-
 rarum, bufonū, astacorū, vitalem faculta-
 tem

tem obtinuerunt aduersus Epilepsiā, incu-
bum, leprā, pestē, quartanā &c. Nec dissimilis aliorum est ratio, quibus vitā inesse solus nō videt ille, qui calorē ignis nō sentit, vel nō videt cœli rotūditatē. PH. Intellico. sed quò me iā ducis? CH. In physicū Plātariū; omniū vegetabiliū sulphure, sale, Mercurio refertū. PH. At cū eam fecisti gratiam, vt mihi liberum sit παρρησιάζειν apud te: ne obsecro molestum sit ea audire, quę nostri contra has vegetabilium extractiones solent obijcere. CH. Immò nisi tibi molestū sit dicere, mihi audire volupe est. PH. Afferunt; se in crassa vegetabilium præparatione iam annis multis medicinam maximo cum successu fecisse: eāq; in purgandis, alterādis, & discutiendis humoribus (quæ præcipua sunt artis opera) non minùs quàm nouas hæce præparationes vires suas exeruisse. Deinde hoc etiam timendum clamāt, ne quando subtilioribus illis extractionibus corpora subito mutantur, fiatq; interim magna caloris natui atq; humidi primogeniti iactura. Chemicam tamen nullo modo damnant: sed cur præ ceteris officinarum præparationibus

extollatur, nō videre sese affirmāt. CH. Sanè quod chemiā nullo modo damnant; maximè laudo. & ego vnà improbo illos; q̄ in omni morbo solis chymicis medicamentis vtuntur. Nam cum contra mures aut formicas bellandum est, suffecerint Pygmæi vires: tamen qui cum leōne certauerit aut apro Ætolico, huic Hectorea manu aut Gigantum robore est opus: id est, mea quidem sentētia, chymicis medicamentis. vel vt clariùs ipsorum præstantiam ceu ob oculos positam intuearis; dic mihi qualē Galenici in atrophia imperant diætā? PH. Nempe cibos euchymos elixandos præscribūt: iubentq̄; illorū succum exprimi, pinguedinē separari, fecē reijci, alimentosum à nō alimentoso diuidi, singula deniq; separari, quæ facili concoctioni impedimento sint. Panis itidem loco amylium lacte maceratū cōmēdant, & ex vinis illud eligendū sentiūt, quod ab omni spuma, tartaro, & fecē depuratissimū est. CH. Rectē. sed cur panem; vinum; carnesq; vulgari modo præparatas non exhibent? PH. Quoniam eo modo deuoratae plus excrementi gignerēt quàm alimenti, atq;

atque non reficerēt sed re ipsa opprimerēt naturam. CH. Equidem admiror vos in Analeptica tam lynceos, erga medicamentorum chymicam præparationē tam proteruē animatos esse. nam si ciborum optimi succi extractiones ad corpus restaurandum necessariae sint: quanto magis medicamenta ad corpus alterandum nata defecare & repurgare conuenit vniuersa? adde etiam nonnullorum remediorum partes venenatas esse, aliquorum deleterias, plurimorum otiosas, nullorum nisi fortē per accidens salutiferas. PH. Quid audio? annon vires medicamentorum totæ totis ita miscentur à natura, vt nullo hominum inuento seorsim eliciātur? CH. Neutiquam herclè verò. Nā in Galeni tui scho-^{3. de Simi:} la audiuiſti, Aloem exactè lotā pur-^{fac. 13.} gatiua facultate dispoliari. vt quoque vsu venire solet æris squame, aut æri vsu. Docent te etiam Neoterici eam dūtaxat rhabbari partem purgare, quā vinum maceratione facta absorbet. immo in integra totius substantiæ libra, vix vnciæ Rhabbari sex reperiuntur, quæ aluum vel tantillum poterint mouere: reliquæ verò ceu

ἐπὶ σίον ἄχθος ἀφ' ἑρπης, cloacæ potius committi quàm hominibus propinari debet.

PH. Equidem vero simile loqueris, Chymista. Quid ni enim iuxta atque in nobis liquores inueniuntur heterogenei, quorū alij sunt medicamentosi, vt biles: alij alimentosi, vt sanguis: alii contrà excrementosi, vt vrina; sic etiam in cunctis medicamentorum generibus se habeat, quæ medicis ad corporis alterationem vti sunt? probo igitur hanc artificiosam eorum anatomiam, eamque cito discere percipio.

CH. Immò illud quoque attendas velim; Naturam nihil nobis puri dedisse: sed omnia permultis miscuisse impuritatibus vt istam nobis scientiam ab infantia noscendam esse ceu quodam necessitatis stimulo inculcet. animaduerte enim panificii rationem: quo primùm modo triticum à palea longa trituratione & chymico veluti delectu separatur. deinde furfur à polline cribro rudiori, & postea spissiore diuiditur. pollinem cribratum coquimus, coctum mandimus, mansum in furno triplici recoquimus: nec tamen ita depuratur à nobis, quin insitus ille cuiq; mēbro chymista

mista excrementa quædã inueniat ab ac-
 cersita expultrici potetia eliminãda. Nèc
 minùs eadem de melle, lacte, & liquore
 quouis humanæ naturæ familiarissimo re-
 ferri possit historia. nã si eo quo nata sunt
 menstruo infecta exhibeantur, varias re-
 linquent feces, quæ si in corpore diutiùs
 permãserint nō excretæ, morbillos, vario-
 las, lepram, morbosq; venenatissimos pro-
 ducunt. Quanto autem magis purum ab
 impuro, inortuum à viuo, deleterium à
 familiari atq; vtili, in Helleboris; Colo-
 cyntidè, Coccognidio; Turpeto, Esula;
 Rhabbaro, Sēna, Agarico, omnibus de-
 niq; purgātibus separare opus est? in quib?
 non πολλά, vt in Ægyptiæ pharmaco; sed
 παῦρα μὲν ἐοῦτ' ἀ μὲν γ' ὁρᾶται, πολλά δὲ λυ-
 γέει. Immò ne Aromata quidē cordi hu-
 mano familiarissima tam præclarè atquē
 chymicè naturæ manu parantur, quin no-
 bis vltrà depurādi præbeant occasionem;
 & necessitatē quandā imponāt laborādi:
 Nam cinamomi libra semunciam olei ef-
 fundit; caryophyllorum sesquilibra tari-
 tūm quartarium; nucis moschatæ vñcia,
 drachmam semis; ligni aloes quartarium;

drachmam vnam: in quo tamen oleo sine sulphure, omnis vis illa aromatica quasi in radicali quodam & spirituofo humido delitescit. Eadē quoq; habetur ratio in anisi, cumini, dauci, feniculi, rosarū, croci, &c. extractione: quorum quæ minimæ supersunt partes, in eas omnis facultas deriuatur: vt non immeritò de illis etiam perinde atq; de formicis dici queat; natura est maxima in minimis. Si igitur siue purgatiuū, siue diaphoreticum, siue vrinā aut vomitum excitans arcanum in sulphure solo commoratur, quid nobis cum Mercurio aut sale negotij est? si in sale, aut Mercurio, quorsum sulphur datur? Quū in centum viginti granis Rhabarbari octuaginta otiosæ reperiuntur nō purgantes: cur ipsas purgaturi ægros Galenici nō tollūt? quare admiscēt? nunquid liberū videtur, quando nucleus deuorari debet exhibere cibo putamina? Quū etiā in croci libra decem veneni vncięprehendantur (deprehenderunt autem primū chymistę) sanè nisi cū humano corio ludere impunè possent tui Athenienses, illas iam diu facta per tincturā heterogenei separatione abstulisset. Quare, hospes, Chemię iam nūc agnosci-

to præstantiam: cuius beneficio viuã Anatomiam discēs, simpliciũ, quid? sales? mercurios? sulphura? immò influentias, signaturas, potestates, astra, vitas, resurrectiones elucidantem? PH. Equidẽ chymicorum tuorum nitor, elegantia, lautitia ita me in tuas partes transuersum diripuerũt: vt magna quidẽ dubitatio sit, an rursus ad Galeni scholam vnquã pelliciar. Tamen nõ ad illud respõdisti: communiũ remediorum optimum fuisse successum, illorũq; vsum fuisse nõnullis hominibus salutarem. CH. Quid ni? nihilo minũs sicuti aliter lignum cultellus scindit, aliter securis: ita etiã citò nulloq; penè negotio eas confestim tollimus infirmitates, quibus eradicãdis Galenici ne mēsis vnus spatium suffecerint. nihil mētiõ, hospes, nihil simulo: atq; rē ita habere tũ praxeos voce, tum rationũ pōdere euincã. Nonne in quauis medica operatione, *ἡσυχως, ταχέως, ἀσφαλῶς*, iucundè, citò, tutoq; agere oportet? PH. Oportet quidem. nã & sensus id ipsum suadet, & Hippocrates imperat. Sed cur hæc tria assequi non licet cõmunibus medicamētis? CH. Quia non vult fatum. Nam si corpus ali-

cui purgandum sit, quo instrumēto id faciendum diceres, Atheniensis? PH. Fortè Rhabarbaro, Aloe, Senna, Mechóaca, agarico, polypodio, visco quercino, epithymo, cassiæ pulpa vel manna. CH. Tutta sunt hæc fateor medicamēta, sed nō satis propter suam nimiam amaritudinem, dulcedinem, aut saltē quantitātē nimiam iucūda. PH. Ad fortiora igitur cōfugiam, scammonēā, turpetum, laureolā, esulam, elaterium, quæ nec ingratum præstant saporē, nec dosis magnitudinē requirunt. CH. At si sola exhibeantur, nō tutò purgabis: si multis aromatibus cōdita, vt moderni solēt, nihilo gratior erit purgatio, quàm si Rhabarbari tres drachmas aut mānē tres vncias exhibuisses. ita vt si lenibus vtaris catharticiis vulgari quātitate exhibitis, celeritatem tollis: si fortioribus, securitatē; si alterutris cū Galenica securitate exhibitis, tamen vel dosis vel mali saporis odorisue exuperātia tolles iucunditatē. PH. At in officina varias compositiones purgantes, tanta dexteritate mixtas habemus, vt corpori citò, tutò, iucundēq; euacuādo nullis cedere putētur. CH. Ah noli ampliùs officinæ

cinę meminisse vestre: quā si deposita cō-
tētionē examinarem, & (vt Gręci loquun-
tur) ἀνευπαθῶν: nullam tamen veterū com-
positionē purgantem ijs prăditā esse vir-
tutibus facilē euicero, quas Hippocrates
desiderauit. Nam si Hieram Galeni obij-
cis, Deorum (si dijs placet) inuentū: quid
ea stomacho, naribus, palato, ingratius?
quid cunctis membris iniucundius potuit
excogitari? illa autem Hamech, Diaphe-
nica catholica, & cetera electuaria, pluri-
mis ægrotis (dum ijs Chemicę imperitus vti
cogerer) tam inuisa fuisse ingenuē & verē
fateor: vt etiā ego ipse illis odio esse cœpi,
meq; fortē fortunā conspicientes ad vo-
mitum permouerentur. Quę licet per se
fatis fuerint ingrata, quantitate tamen tan-
ta exhibentur à tuę disciplinę hominibus:
vt non curaturi homines, sed equos suffo-
caturi videātur. ò infelicē principū condi-
tionē, qui sua corpora huiusmodi impuri-
tatib⁹ hospitia, vel potiùs sepulchra prębēt!
Quid loquar de pilulis vestris globulo ferē
tariorū æqualibus? quas in honorē Romę
septicollis numero septenario vel musa-
rū nomine nouenario pręscribere soletis.

pares nunquā facitis, quia numero Deus
 impare gaudet. Pumbeas quoq; , aureas;
 achrestas, polychrestas; tenebrarum, lu-
 cis; sine quibus esse volo, sine quibus esse
 nolo, vocatis: atq; ita speciosis nominibus
 ingratissima medicamēta, tanquā fronde
 aspidem obtegitis. Taceo syrupos longos
 & breues, magistrales communes, vnos &
 alteros, nescio an magis doctorum delira-
 menta, an ludos fœminarū. Transeo item
 aromaticas cōfectiones, quibus nihil pue-
 rilius est; nam si saccharo percocto parum
 ex oleo stillatio cinamomi, anisi, cumini,
 margaritarum, ambræ, moschi, rosarū ue
 infuderis: me tibi mancipiū, nisi diacina-
 momo, dianiso, diacumino, diamargari-
 tæ, diambra, diamoscho, diarosato aro-
 matico, vt gratius, sic efficacius præscripse-
 ris medicamentum. PH. Næ tu nō exa-
 minas, sed exanimas officinā nostrā. Ta-
 men reuera ab illius cōfectionibus valdè
 quoq; meus animus abhorruit, cum ipsas
 vel ingratitudinis vel periculi plenas vide-
 rem. soleo enim quoties bilem purgare vo-
 lui, scribere in hunc modum: *R^e rhabarb.*
electi drach. 2. spica Indica, cinamomi, ana
scrup.

scrup. unum. infundantur in aqua endiuia per noctem. expressioni adde syr. ros. solut. unciam unam. de cichor. cum rhabarb. sesquũciam. vel sic: R^e manna el. uncias duas: rhabarb. in succo endiu. infusi scrup. duos: diacathol. drachmas quinq; Trypheræ pers. drachmas duas: cū aqua cichorij in qua prius agarici drachma fuerat infusa: fiat potio. Si autē pilularis forma conuenientior sit, sic scribo ex Medica syntaxi Colmariensis: R^e spec. hier. scrupulos quatuor. rhabarb. el. drachmam semis. coru cerui, rasura eboris, cinamomi, ana scrupulum semis. cum syr. eupator. q. s. fiant pilule n^o. nouem.
CH. Ah, apage hæc prolixa deliramenta, & sic scribe: *Accipe Tincturæ rhabarb. scrupulũ unũ: grana duodecim: olei spicæ & xyloaloes destillati, ana guttas tres. si verò phlegma euacuandum sit, præscribe, Tincturæ Turpeti drachmam semis. olei anisi guttas 6. olei caryophyll. guttas duas. misce. Vel sic: Accipe tincturæ esule vulgaris grana 16. olei anisi, cinamomi, ana guttas duas. Quoties verò bilem atram purgabis: Accipe Tincturæ sennæ Orietal. drachmam semis, tincturæ helleb. nigri grana quinq; olei anisi, fenicul. ana guttas duas. petroselini, cinamomi, ana guttã*

unam. misce. atq; sic exiguo medicamēto plus profeceris, quàm si illas tædiosissimas receptas instituisse. Talis etiam Aromaticorū, diureticorū, diaphoreticorū, Anodynorū, vomitoriorūq; nostrorū cōditio est: quæ in chymico nostro Antidotario propediem (nisi hominū ingratitude deterrear) excudēdo fusius explicata, & cuius pathemati diligenter applicata inueneris. PH. Sanè tu hæc remedia Seruitoris, Cordi, weckeri, Augustanorū deniq; & cūctis seplasiariorū formulis gustus saporisq; lenocinio, dosis exilitate, & operādi celeritate præstātiora esse, vel nos p̄tinacissimi Atheniēses fateri cogimur. Nūc in eo totius quæstionis cardo vertitur, utrū æquè tutò exhibeantur! Etenim ad nostras aures rumor non ἀδίσποτος peruēnit; chymica remedia esse omnium longè periculosissima, variosq; ægrotos præ nimia sua in agendo violentia abstulisse. tantam quippe caloris insiti faciunt iacturam, quantā refarcire omnia restaurantia iuscula nō possunt. CH. Noui, hospes, chymica remedia non solū apud Atheniēses, sed etiam in quauis patria traduci, verū quàm absq;

omni

omni suo meritò id fiat, id iustitia viderit, & ego adductis principum, comitū, aliorumq; Heroum & ciuium nec non Theologorū testimonijs facilè conuincā. Nam non solum in Cæsaris Regisq; Danorum aula hæc remedia in vsu pretioq; esse cœperūt: sed etiam à nostris aulicis & saniore hominum parte tam vnicè expetuntur, vt ijs semper vtī nō posse semper doleant. verūm sicuti acutissima quæq; & optima nouacula, à chirurgo fatuo adhibita, nō salutare sed lætale vulnus infligit: ita etiam suā naturā tutissima omnia atq; optima chymica remedia propter vtentium imperitiā malè audiunt, καὶ τῶν τεχνίτῃ σφάλματα (contra omnē Iustitię sensum) νομίζεται εἶναι τῆς τέχνης. Contrā chymico tantū cognitionis consecuto, vt Quod, Quantum, Quibus, Quando, exhiberi medicamentum oportet, satis intelligat: Me cuius in neruum tradi non recusabo, nisi ille officinarum præscriptis oculum effodiat, & securiùs multo, laudeq; plurima exerceat medicinam. sed nunc in mineraliū Theatrum pergere, hora nos admonet. age igitur; sequere me. PH. Nolo inquam. nam

quid hæc ad medicum? CH. Beatum faciunt dextrè adhibita, & vt vulgi sententia vtar penè ἰσοθέον. PH. rectius ἰσοδάμωνα dixisses. nam utcunq; tuas animalium vegetabiliumq; extractiones magnificiam, tamen ne mineraliũ vsum approbem, mihi semper religio erit. Foris quidem applicatis, diuinas nonnunquam vires exeri agnosco: intus autem exhibita veneni sortiuntur vires, & nisi me veterum recentiorumq; fallit iudicium, aspide maligniora sunt. CH. Caue dixeris: ne fortè vtrique tam veterum quàm recentiorũ sectę eiusmodi infligas vulnus, quod postea cicatricem non admittet. Nam Hippocrates θεῶν ἄντρον asthmaticis sepè prescribit: nec nõ æruginẽ tritam cū melle & syrmaea potione admixtam. Galenus itidem (ille medicorum deus) sulphur viuũ & Melanthium ad dyspnoicos commendat: & contra dysenteria à calce viua, squama æris, auripigmento & sandaraca non abstinet. tantum quoq; mineralibus indulgit, vt ab Andromacho Theriacæ inditæ chalcitin non expungeret. Quinetiam florem æris intus exhibitum optimè purgare corpus audacter

Lib. De
morb.
mul.

7. De cōp.
med. S. l.

9. De cōp.
med. S. l.

Lib. De
antid. &
3. de sim.
fac.

Æter afferit. Quid referam Archigenem,
 Andromachum, Actium, Trallianū, Dio-
 scoridē, aliosq; infinitos Græcos & Ara-
 bas, qui noxia perinde atq; innoxia mine-
 ralia intus feliciter & cum laude sua pluri-
 ma exhibuerunt? Neq; vnquam tam im-
 pudenter nanciscar hostem, qui perlectis
 ipsorum scriptis me ipsorū patrociniū ab-
 uti asseuerabit. Matthiolus verò (vt Neote
 ricorum quoq; adferā iudiciū) in mor-
 bis altas fibras agentibus, necessarium esse
 affirmat vsum metallicorum. Iulius quoq;
 Alexādrinus disertis verbis Antimonium
 in peste oppugnanda summum dicit arca-
 num. Ioannes Crato post infinitas cū chy-
 micis dimicationes, miniū natiūū magne-
 tem Epilepsiæ vocare solitus est: mihiq; i-
 psū primus ostēdit. Pius ille pientissimę
 memoriæ Gesnerus oleo vitrioli illas ascri-
 bit vires: vt vix medici persona dignū exi-
 stimet, qui eo carere vult. Guilhelmus Rō-
 deletius Barbarossæ pilulas argēti viui ple-
 nissimas contra illam cosmopoliticā luem
 variè cōmendat. Gabriel Falloppius, nec
 non Hæctor Nonnius maximæ experiētie
 doctrinæq; viri Crocum Martis ad icteri

Ep. ad Alex.
à Blauen.

Epist. ad
Gesne-
rum.

Ep. 22. ad
Occo-
nem.

Lib. de
morb.
Gall.

Lib. de
simpl.
purg.

curationem, lienisq; obstructions expēdiēdas summis laudibus afficiūt. Felix Platerus stibium Antimoniatum recta præparatione, mixtura, dosiq; exhibitā helleboro albo faciliè præfert, eoq; dum ego illi essein conuiua felicissimè vsus est. Ioachimus Camerarius Borace crySTALLINO (cuius præparationem à Langrauiio Hassiæ acceperat) in vomitu dextrè ciendo cūctis (& meritò) præfert medicamentis. Possim hic adferre Zuingeri Ostruthium, Thielæum, Orionium: nec non Aragosijs Oxyleum: Hagecij Pactolum: Seuerini Turturum, Aquilam, Draconem, aliorumq; metallicorum & mineralium aureas præparationes: à quarum vsu non magis quàm à vini exhibitione, pio cautoq; medico abstinendum censent. Ita vt siue veterum iudicio, siue recentiorū suffragio stare velis; Mineralia & metallica remedia nō solum locum suum mereri apud medicos cōcessurus es, sed debere etiā in multis internis affectibus cūctis medicamētis præferri.

PH. Concedo atq; vnā video illorum non ferendam impudentiā, qui metallicorum vsū veteribus Neotericisq; displicuisse
sine

sine omni rubore fingūt. Tamē (si tua pace id liceat) hominū missis auctoritatibus, ad rationum puncta te conferas: quibus Antichymistas tuā Thesin comminuisse satis videntur. CH. Audiamustandem illas.

PH. Optima Mineralia, sint præparata quocunq; modo, nullā cum humano corpore obtinent similitudinem. quin etiā ipsorum plurima, nempe argentū viutum, Antimonium, Arsenicum, salia, flos æris, chalcidis, vitriolū, alumē; insigniter erodendo vel metallorum minuūt substantiam: tantum abest vt corpus humanum, molle, membraneū, fragile ad medullam vsq; non perforent. Si igitur neq; nos resistere possint propter substantiæ dissimilitudinem, nec alterare præter erosionis corruptionisue periculū: quis obsecro illorum vsum non damnabit, vosq; ipsorum authores nō irridebit. PH. Immò, Atheniensis, vtraq; ipsorū de noxijs innoxijsq; metallicis sentētia horridior est, quā vt veritatē vel tantillū æmulari queat. Nam longa experientia comprobatum est aurū ad cordis, argentū ad cerebri, ferrum ad lienis, cuprū ad hepatis corroboratio-

nem plurimū facere: siue ignita in liquore appropriato extinguantur, siue in crocum & essentiam suam redacta exhibeantur. Quinetiam saturnus vitrificatus (non secus atq; bilis aliqua esset) aluum subducit: sulphur nutrit pulmones, cristalliq; liquor renes instar feri cuiusdam optimi expurgat. sed esto: Mineralia nullam obtinuisse cum humano corpore similitudinē. an propterea illorū vsum rejiciemus? quid ni igitur vno eodemq; pessulo colocyntidem, helleboros, viperas, aliaq; id genus deleteria medicamenta & nobis omnino antipathetica excludimus? PH. Quoniā nō est tāta dissimilitudo. nam hęc olim vnā cum homine anima vegetatrice prædita fuerunt: mineralia verò nequaquam. CH. Pulchrē. quasi vos etiā plantas animaliaq; tum primū non daretis hominibus, cum animam amiserunt vegetatricem. PH. Verūm quando Mineralia metallicaue medicamēta nullā cum humano corpore cognitionē habere dicerē: hoc volui intellexisse: Non conferre ea ad spirituum restorationem. vidi enim aurum, coralla, margaritas, smaragdos, carne-

carneolos, hyacinthos aliosq; pretiosi generis lapillos, tusos, coctosq; phthificis nō plus profuisse, quā si vitrū deuorassent, aut silicem. Quare hæc ad ægroti crumenæ euacuationem, non corporis refectionem ab Arabibus hominibusq; fanaticis inuēta clamāt Atheniēses. nec video quo tandem modo illorum clamores falsi redarguantur. sunt enim omnium metallorum, lapidum, & mineralium partes tam crassæ, ut in nostrum corpus rarissimū & spiritibus subtilissimis præditū cedere nequeant. CH. Immò tui tecum magis verè errant, quā clamant Atheniēses. Quippe quòd mineralia quædam, non corpus tantum humanum, sed aurū, stannū, plumbum, instar fulguris cuiusdam pertranseunt. Argentum viuum, me nihil à veritate alienū dicere, suo probat exemplo. huius enim spiritus frigidi hominem longè remotum feriunt paralyti; calidi verò destillatorē insigni capitis ardore afficiunt. cum igitur argētum viuum cunctis insit metallicis, equidem ea in hoc exaltata spiritus educunt nō modo subtilitate analogos nostris, sed multo penetrantiores. Atq; ut de

lapidibus dicam, quis illos inuisibiles magnetis spiritus nostris subtiliores esse negabit, quibus ferrum longè diffitum attrahit atq; adunit? vel quis spiritū vitrioli eò penetrare non videt, quò omnes vegetabilium aquæ & olea illa aërea non perueniēt? sal quoq; mineralis tanta præditus est subtilitate, vt paucorum granorum pondere magnam farinæ massam inficiat. Habent igitur mineralia suos spiritus subtilitate nostros vincentes. tantum abest, vt subtilitatis inopia corpori reficiendo impares cēseantur. PH. Esto: lapillis pretiosis, gemmis, auro, argento, ferro, sulphure itidem & alijs nō noxijs mineralibus per me vtaris licet: siue ad corporis nutritionem, siue eiusdem alterationem putes cōferre. Absit tamē vitriolum, chalcitin, argentum vinum, arsenicum, antimonium, atq; alia id genus leprosa, impura, atq; corrodetia mineralia in humanum corpus ingeri & ad perpetuam tui nominis ipsiusq; artis infamiā vsurpari. CH. Quid ita, hospes mi? PH. Nam cum oleum vitrioli etiā à Gesnero toties laudatum, scutellā stannēam exedit: quis simile periculū in stomacho nostro

nostro membranco non meritò verebitur? vel nunquid verisimile non est, antimonium vniuersa intestina deglubiturum, quod cum auro fustum ne micam sordium relinquit? Quum etiam Mercurius metalla omnia reddit friabilia, cur non iure timeamus, ne nobis inditus, carnes, cartilagine, atq; adeo ipsa ossa totius corporis columnas ceu saxo aliquo molari in puluerem comminuat? Arsenicum autem tam effrænata malignitatis esse cognoscimus, ut qui ipsum corpori ingeret ante audacem Paracelsum nulli fuerint reperti. CH. Asperatu quidem tela elidis, sed quæ faciliè retundi queant à philosopho exercitato. Nam si oleum vitrioli propter stannum ab eo exesum humano corpore exulabit: quid vino sublimato, aceti mellisq; spiritu, quid sale, & limonum citrorumq; succo fiet? nam eorum vnumquodq; stannum absumere, vel semestris medicus agnoscit. PH. At non tam paruo temporis curriculo, atque spiritus ille vitriolatus. CH. Immò sanè minori, si cum nostro illius exhibendi modo cõferatur ratio. Nollẽ enim te aliquem Chymistam tam stupido ingenio præditum

existimare, vt oleū vitrioli nullis alijs mixtum liquoribus propinare ausus sit: sed potiùs ad aquæ rosacæ vel alterius liquoris libram olei vitriolati guttas totidē adijcere, quot ad aciditatem comparandam satis esse queant. cui liquori oleo vitrioli acescenti si tantū stanni immerferis, quantum aceto: nullū non inuoco supplicium, nisi stannū multo magis corrosūm reperiat. Verūm si hoc oleum vitrioli, vel etiam sulphuris in vsu esse nō mereatur propter erosionem, quò se conferent cantharides, à Galeno inter ea medicamenta relata, quæ ne gustare quidem audeas propter summam putrefactionem atq; erosionem? Tamen veterum ferè omniū atq; multorū neotericoꝝ praxes eas ad vrinā prouocandā, penisq; ἀπορίαν, & suscitandam Venerē vsurpant atq; commēdant. PH. Nequeo diffiteri. sed tamē parua quantitate eas præscribūt, & non nisi alijs cōuenientibus rebus admixtas. quo quidē modo exhibitæ nō solūm innoxia perhibentur, sed etiā persalutares. CH. Vera prædicas. atq; ego itidem respōdeo; olea prædicta debitā quantitate, mixturā, præparatione

Lib. 3.
De simpl.
fac.

3. De
simpl.
fac. cap.
18.

tione exhibita, tantum non corrodere corpus humanum: sed eius spiritus reficere, febres extinguere, obstructions aperire, putredinem arcere, venena exigere, sitim sedare, vlcera percurare, omnesq; illas vires cum laude sua plurima exerere, quas illis Gesnerus epistola ad Cosmam medicum, aut Paracelsus in libro De vitriolo ascripserunt. Memini ante annum me vnà cū Doctore Penneio & ἀρταδέλφῳ meo charissimo Turnero ægrotum quendam cacochymicū inuisisse, illiq; Zulapiū nostrum vitriolatum ad sitim sedandam & viscera aperiēda præscripsisse: quod tamē summus ille pontificiorum ἀρχίατρος, nullo consilio nulla pietate factum impudenter asseueravit, nostramq; medicinam nihil profuturam ægroto multis contendit. Tandem verò omne in se onus recipiendi studiosus, precibus & grato sed falsissimo valetudinis præfagio ita inualuit, vt huic omnis illius cacochymici cura demandaretur. argumentis autem contra vsum olei vitriolati ijsdem planè tecum vsus est: sed quàm absq; omni rubore & cōsciētia, ex eo satis apparet: quòd à disputatione tri-

duo elapso, ipse eodem oleo in eodem ægroto vteretur. Perendie purgavit ægrum ingratissimo medicamēto; sed quàm pessimo successu, sequenti mane & ipse & omnes amici ad summum doloris sensum intellexerunt. Ego verò tam pij optimiq; ægroti vitam dignam esse sentio, quæ mille idolatrarum capitibus redimeretur: fuit enim & Domino suo illustrissimo fidelis, & vitam egit coram alijs graui nulla labe cōspersam. atq; hæc de oleo vitrioli: nunc de argēto viuo, atque antimonio quædam attexā, & postea de arsenico. PH. Quæ de illo pōtificiorū Archiatro *ισοπέυεις*, valdè grata sunt mihi; tamen ne tu in argenti viui laude pudoris limites transiliens in similes scopulos impingas, iterum atq; iterum te rogo. Haud enim video, cur non quartanam aut podagram referas pari ratione inter optima medicamenta. Vidi enim alios sola Mercuriali inunctione in paralyfin, surditatem, strumas, colicos doctores, dysenterias, conuulsiones, tremores incidisse. hic etiam dentes expuit: ille vngues, capillos, maxillam, columellam, artus perdidit. alij periostij distentionibus,

con-

contractionis, morbisq; lue ipsa peioribus
ad extremum vitæ halitū discutiabatur.

CH. Fateor, nihilominus (vt tuæ illæ can-
tharides) argentum viuum certa quadam
præparatione, dosi, & mixtura, diuinum
euadit pharmacum, & solus tam horrēdæ
luis *πρωτόμυος* dici meretur. PH. Nempe
quando enecatur. nōne hoc diceres? CH.
Sanè. rectè enim enecatus Mercurius nō
recrudescit, non rodit, non putrefacit: sed
illam venereā cōtagionem radicitus, im-
mò eradicitus extirpat. sed quid rides?

PH. Quia nequeo nō deridere aliquorum
infantiā, dum Panthera vel tigride ferocio-
rē cicurare, & immortalem iugulare ten-
tāt Mercurium. Quare alij hunc in aceto,
alij in succo limonum, sputo ieiuni, lixi-
uio, aut vrina pueri suffocāt: sextus suspē-
sum tenet: septimus præcipitem agit: octa-
uus verò sepelit in ærugine: nonus stanno
includit: decimus enecat hoc modo: *Ac-
cipe arg. viui. q. v. mortario plumbeo impone:
quod linteo obducitur cineribus cribratis ple-
no. super cineres liquatum plumbum septies ef-
fundito, & tunc Mercurium exanimatum in-
fundo (ô plumbeum & profundissimum com-*

mentum) reperies, propter odorem plumbi. verum utcumq; ab ipsis enecatus dicitur, in tepidâ positus resurgit, forisq; illitus eiusmodi excitat vlcuscula, quæ luem ipsam excedût malignitate, & vel feris exoptare inhumanum est. CH. Facile assentior, atq; hinc argumentum elicio, communem veterum peritiam nihil ab imposturâ vel saltē imperitiâ differre. Chymici autem Mercurium anima spoliât sola ignea fixatione, atq; ita neq; operâ ludunt, neq; vnquâ cruciât egrotû. PH. Ceterum Galenici nostri Doctores (sic enim vocari gestiunt) noxia mineralia quo magis ad Vulcani violentiam exponuntur, eo acriora esse cõtendunt, & perniciosiorem sortiri vim. Nam si Olympio tantum sublimati deuoret, quantû argenti viui Chalinus: nonne hunc superesse posse crederes, atq; illum certò interiturum? Quinetiam antimonium crudum non magis quàm plumbum lædere, didici experimēto: in igne tamen aliquandiu verberatum, in vitrum abit, stomachû, intestina, singula deniq; membra magno cum vitæ periculo laceßens. CH. non possum hac in parte tibi aptiùs satis-

risfacere, Atheniensis, quam ipsius Gale-
ni verbis, quibus salis Theriacalis præstā-
tiam aduersus calūniantium linguas pro-
pugnat. lege verba. PH. Multa quidem e-
uadunt ignis cōmercio meliora, & laten-
tem naturam edunt. aurum quippe iudi-
camus per ignem, adulteratumq; à puro
separamus. ferrum igne ad multos nobis
vñus aptum est. Nonne etiam plurima quę
ingrediuntur in corpus, ignis beneficio
ad nutritionem magis idonea redduntur?
sané vinum ab vuis pressum crudum est:
solis autē igne concoctū suaue καὶ ἡδύποτον
efficitur. immò quę rudiori sua natura cor-
pus exurunt, vt chalcitis: eadem cocta vl-
cus claudunt. Lapis item Phrygius crudus
acerrimus est: ignitus, præsentaneum o-
culis remedium. immò & viperæ omnes
combustæ insitum sibi virus deponunt, &
ab igne salutes redduntur. Porro multa
medicamēta quādiu veterem suam ob-
tinent naturam, acerrima esse & corpori-
bus nostris inimica, experientia docet: do-
mita verò ignis uiolentia, curationi fiunt
cōgrua. Video te ex istis verbis colligere;
arsenicum, Mercurium, antimonium &

Gal.
Lib.
de The-
riac.

alia quæuis erodentia maximeq; venenata metallica atq; mineralia ignis beneficio salutarem nancisci vim; & si in salem suum (perinde atq; viperæ) redigantur, omnem malignitatem, putrefactionem, venenum, corrosionem, acrimoniamq; deponere. CH. Rectè colligis: atque etiam ut idem credas, nullum ex vniuerso Naturæ penu venenū eliges, quod post factam in igne fixationem bibere recusabo. PH. Damnas igitur antimonium, vitriolum, arsenicum, mercurium, aliaq; id genus nondum fixata medicamenta? CH. Planissimè nisi fortè ijs rebus admisceantur, quæ ipsorum vel leniant acrimoniam, vel malignitatem freni instar cohibeant. sic enim illa ad lædendum facilitas demetur, & medica facultas ceu idoneum nata vehiculum exaltabitur. CH. Facile assentior. Verùm duo adhuc scrupuli me angūt, quos citò euelli cupio. Primum quod non assequor, Quā tandem ratione medicamenta ad fixationem vsq; combusta medicam retineant vim, deinde vereor, ex longa ignitione plurimum empyreumatis cōciliari, id quod nobis ingratisimum & valde

valde noxium esse, nemo non fatebitur rectè philosophantiū. CH. Vtrumq; scrupulum tum tui Galeni, tum nostræ experientiae viua voce euellam. Nam quis in salibus Theriacalibus, tot florum, tot aromatum species recipiētibus vel sensit vnquam empyreuma, vel operi di impotentiam animaduertit? hoc solum desideratur, eos non æquè magno agere periculo: id quod desiderari, mea certè sententia, quàm frui optabilius est. Eam igitur esse ignis non cuiusuis, sed chymici, naturam intellige: vt arcanum nunc in sale, nunc in sulphure, nūc in Mercurio latitans semper retineat, auolare nunquam permittat. Quod verò empyreuma attinet, id nobis ostendit Pyrotechnia; Medicamēta quanto diutiùs in igne manserint, tanto minus habere in se adustionis: quia scilicet sulphur peregrinum diuturna combustionē euauit. PH. Vicisti me, Chymista: atq; ita vicisti, vt qui tuam peritiam furtiuis quibusdam interrogatiunculis expiscatus redire ad Galenicos institui: nūc tibi seruitutem seruire perpetuam nō recusabo, & ciniflonis, argillarij vigilisue locum sub-

ibo. nullam deniq; non admittam conditionem, quæ huic tam præstanti scientiæ perdiscendæ adminiculo sit. CH. Probè facis, Atheniensis. nam iuxta illud Comici dictum, Est qui nos videt atq; omnia moderatur Deus: Bene merenti, bene eueniet; malè merenti par erit. Quæ igitur videris, ea tibi serues arcana memor illius Hippocraticæ legis verè aureæ: τὰ ἱερὰ πρᾶγματ' ἀγροῖσιν ἀνθρώποισι δείκνυται, τοῖς δὲ βέλῃσι, ὁ θεὸς. PH. Memorem mones. ecquid iam restat amplius? CH. Hoc solum. ne vnquam postea Phileraustus dicaris, sed Philalethes: hoc enim nomen vt longè augustius altero, sicer in chymico futuro videtur conuenientius. Age, nunc te destillatoriæ prouinciæ præfectū volo, & reliquis meis seruis præesse. Mihi verò ad ægrotū quēdā lōgè hinc habitantē properò properādū est. Tibi si quis interim scrupulus molestiæ fuerit, cū per literas significas; atq; vt primo quoquo nuncio eximatur, diligēter curabo. Vale. PHILAL. Et tu vale, atq; ad nos vel Pegaso citius reuertere. nā dū te iterū amplectar, etiam si crastino amplectar, seculū est. Vale.

EPISTOLAE QVIN-
QVE MEDICINALES AB
EODEM AVTHORE
conscriptæ.

PHILALETHI GERMANO
Chymistæ - S.

V Enisse ad te quendam Galenicum
seribis, magno conuitiorum men-
daciorumque numero, ceu hastis amen-
tatis instructum. Qui licet non scutum ef-
ferri postulat, sed scuticam: placuit tamē
tandiu illi respondendo vacare, quandiu
ægrotus hic apud quem nunc versor, otii
mihi concesserit. *Obiicit, inquis, Chymistas*
à patrum auctoritatibus omnino recedere: id
quod in aliquibus si faciant, probrum ho-
nestum iudico: si verò in omnibus (vt is
malitiosè fingit) censeo periniquum.
Valdè enim probo illud Hippocratis; col-
laudo omnium medicorum sententiam,
ἢν ὅτι ἐκ ὑπὲρ πάντων ποιῆται τὴν ἀρχὴν, καὶ
τὴν ἁγὰ φρονεῖ ἐκ τῆς φαινομένης μεθοδεύει.
Elegans quippe est ex demonstratione at-
que opere manans oratio, inelegans con-

tra & infructuosa, ex sola imaginatione perueniens. Non secus cum Chymistis agitur, Philalethes, eadem libertate Galenum in variis locis linquentibus: quâ ipse à proauorum de vnico elemento sententia olim defecit. Sed audiamus cætera cōuitia, quibus meam Chymicam Basilicam ceu igne quodam malorum incendere instituit. Dicit *Chymistas omnis politioris doctrina ignaros esse: græcos non legisse authores, Arabas vix à limine salutasse. à solo Paracelso, ebrio, mago, impostore, agyrta, circumforaneo, obscuritatū artifice, cæli terræq; odio edoctos*. Magnā deniq; taliū verborū illuuiē nesciō an ex animo, an ex ore feculentiore eiecit. Cæterū ne nos in chymica tātum palæstra animosos esse existimet, & domi solūm pugnaces, more galli: ego illū Thra-sonē (omnium Chymistarum minimus) in sua ipsius arena prouoco, & secum in Græca Arabicaue planitie cōfligere, neutiquā timeſco ſolus. Quod verò nos à solo Paracelso edoctos ſcribit, non abhorret à cæteris, mendaciis. Quandoquidem Hermetis Trismegisti, Isaaci, Baconis, Nortonis, Riplei, Voſchii aliorumq; penè infinitorum

torum libri multis annis ante Paracelsum
 natum conscripti plurimum nos erudie-
 runt, & ex huius penè inextricabili la-
 byrintho eduxerunt. ad Paracelsi vitia,
 id reddo loco responsionis: Hominem vi-
 tio carentem, rarò videre est: amo autem ^{Hip.}
 maximè eum, qui delinquit minus. Sed ^{Lib.}
 sanè curiosulum Galenistam esse oportet, ^{De vet.}
 & minus improbum, qui in Theophrasti ^{med.}
 pectore serpentis oculum gestans, sua in-
 terim scelera nō videt. Tamē vt vt flagitio-
 sus & omnibus vitiorum nominibus con-
 taminatissimus fuerit: Chymistē id esse of-
 ficiū signūq; sæpius dixi, non quem-
 uis aut quoduis imitari; sed arripere quæ
 bona sunt, eaque in vitæ vsum transfertē.
 Nam vt Venus sese offerens atque agglu-
 tinans venereum excitat nepotulum, ca-
 stum verò & pudicum adolescentem nō
 vrit: ita etiam Paracelsi alteriūsue authoris
 vitia animum fortè improbum delectant:
 Chymicam autem siue depurata[m] men-
 tem non mouent. Cabala naturalis, Pyro-
 technia, Medicamentorū exaltatio, Phy-
 sices contemplatio, festiuitas, mirabilis in-
 uentio, ingenium singulare Paracelsi; Hęc

Chymicos delectant, capiunt, alliciunt, attrahunt. Magia non naturalis, ebrietas, maledicentia, methodi contemptus, ea quidem omnia à Chymicis non solum in Græcis illis & Ethnicis, sed etiam in ipso Paracelso reprehenduntur. Verùm ut illi quisquis sit calumniatori suos quoque deos aperiam, Nullum vitium Paracelso inesse affirmo, quin illud aut vicarium aliud quod Hippocrati suoque in primis Galeno poterat adscribi. *Fuit obscurus Paracelsus:* fateor & causa iubet. Sed quoque obscurissimus Hippocrates, neq; à Galeno quàm verba, quàm sententias, intellectus. *methodum ignoravit.* Eandem quoq; nesciuit, vel saltem spreuit Hippocrates: dum nobis medicinam rudem, indigestam, incoctam, & rerum confusione, tautologiisq; plenam obtruderet. Eo fortè consilio, ne suæ posteritati, cuius socordiam prævidit, omnis laborandi occasio eriperetur. Addit præterea: *Paracelsum contraria quandoq; ponere principia: nec tam Proteum à seipso, quàm Paracelsum à Paracelso differre.* Verùm nisi huic *μνημονικῶν* errato venia detur, educemus denuò Hippocratem infinities à seipso dissen-

sentientem. Testor Cardanū, Rorarium,
 ipsumq; adeo Eraſtū, qui varias ipsius cō-
 traditiones animaduenterunt. *Sed fuit Pa-
 racelsus quoq; magus, impostor, habuit q; cum
 demonibus commercium. Ebrietati ita indul-
 ſit, ut integros dies noctesq; cum rusticis, ba-
 iulis, & fece carnificum compotaret.* Quæ si
 vera eſſe omnia concederem: habent ta-
 men Galenicæ medicinæ patrōni ſimiles
 næuos, vel multo tūpiores quidem. Et ne
 ſolūm ex imi ſubſellii medicis tanquam
 de fece videar hauſiſſe, intueamur rursus
 Hippocratem atque Galenum, quos illē
 diuorum ſanguine natos paſſim clamat.
 Verūm (ut Indi aliquando ad Hiſpanos ſe-
 ſe diuorum filios facientes non ineptē re-
 ſponderunt) ſi deorū filii talia admittant
 ſcelera, quid nobis deorū ſobolē aut pro-
 ſapiam Apollinis commemoratis? videtē Lib. de
 an iuſtum, an naturale fecit Hippocrates, Na. p.
 an quicquam diuo dignum, cum proſtiga-
 tæ pudicitia ſaltatriculæ abortum data o-
 pera moueret! ſi factum neges Æthiopem
 lauas: ipſe enim fatetur reus. ſi agnoſcas: a-
 gnoſce vnā eius impietatem, qui plus me-
 retricis animo, quam Naturæ Deiq; vo-

luntati optemperauit. Scio quendam Galenistā præclari nominis huic strumæ diabaphū prætere, factumq; Hippocratis æquitate quadā absurda, vel potius æquitate specie defendere. Alii verò, vt suo patrono bene sit, hoc scelere Polypū aspergunt: cū tamē rē agnoscat Hippocrates à se commissam, atq; propterea iuramēto posteros obstringat, *γυναῖκί μὴ διδόναι πρᾶσιν φθόρον*. Galenus deniq; vt erat in omnib. φιλόδοξος, inuidus, malitiosus: ita quoq; mentitur multa, nōnulla torquet, & variis in locis sese Platoni, Hippocrati, Mosi, immo Creatori, Redēptori, cūctisque Christianis opposuit inimicum. Notum est rem ita habere, atque scribo. nil addo illius tātis sceleribus, nec addendum censeo: quandoquidem hæc sola satis putere, & Galenicam impietatem probare videātur. Nunc venio ad ignorantiam Paracelsi in litteris scientijsq; humanioribus: quam vti non inficior fuisse aliquam, ita nec cōcedo tantam, quantam is esse vult. Nam Galenicam nouit doctrinam: in Hippocratem commentatus est: Arabas examinauit: librum de Tartaro vna cum Chirurgicis aliquot

Lib. 2.
& 3. de
diff. puls.

Lib. 11. de
vls. part.

liquot scholijs latinis mādauit litteris, & publicè in Academia Basiliensi dictauit. Verùm esto, *Paracelsum germanicè tantum locutum esse*. quin & tantum græcè Hippocrates. vterq; scilicet patriam tantum linguā. Hocine in Paracelso reprehensione dignum, & prætereūdū in Hippocrate, Actio, Actuário, Galeno, Moschione? Totus à iustitia alienus est ille Galenista, nihil sani obtinet, nihil modesti. Nam quid mea refert, Græcusne legatur, an Anglus? Italus, an Gallus scriptor? Siccine nos peregrino lumine delectari equum est, vt natiuos despiciatui habeamus soles? Quid impedit, *ἐὰν ὅς παρῇ*, Heluetiam Angliā, aut quamuis terram Græcos vt mechanica (qua tamen olim efferebātur) sic etiā medica cognitione superare? soli Græci medici? nulla rerum mutatio, nulla vicissitudo est? immo plurima. Nam Italia, Gallia, Germania, Hispania, Dania, nostraq; toto diuisa orbe Britannia, omnium artium dominæ & sospitatrices florent. hîc sedent sciētix, hîc habitat Medicina, hîc Hygiæ & Panaceæ fanum est, hîc Hippocrates suis exulans excipitur, & Galeni opera poliuntur

eorum scriptis, quos ipse vrsos, leones, apros, & omnino barbaros vocauit. Illam igitur multilinguam peritiā in Paracelso desideratam, vt ego non reprehendō; ita nolim à Galenista illo calumniatore tantopere extolli, ac si ad boni medici essentiā pertinere videatur. hunc enim non tam πολυγλωττία quàm πολυπράξια efficit: Mediciq; ab ægris opera conducitur, non oratio. Deinde cū multi Græcorum nullum idioma calluerunt præter vernaculum: difficilis sed necessaria Galenistæ optio datur, vel vt suæ familiæ Atlantes damnet, vel hominem patrio tantum sermone instructum medicinæ coryphæum esse posse ingenuè confiteatur. Præterea suus ille, quem se amare simulat, Hippocrates ad perfectam medicinam septem hæc sufficere contendit: *Naturā, præceptionem, locum studijs aptum, institutionem à pueris, studium, industriam, tempus.* rectè. nam Natura duce procedunt, ipsa reluctante irrita fiunt omnia. hæc enim velut ager est. præceptiones seminum tenent vicem. institutio a teneris cum agricola cōuenit, qui opportunè facit sementē. locus studijs
aptus

aptus aeri respondet è terra nascentibus
 alimentum suppeditanti. studium cultura
 est. industria culturæ famula. tempus de-
 niq; hæc omnia in medico corroborat vt
 perfectè enutriatur. His septē in Medicinæ
 studioso cōcurrentibus Medicū fieri posse
 inquit Hippocrates, *μη λόγῳ μένον* per vr-
 bes, *ἀλλὰ καὶ ἔργῳ* obambulantem: illā au-
 tem non requirit *πολυγλωττολογία*, quæ
 fortè adornat medicum, nō efficit: & ma-
 gis ad personæ eius elegantiam, quàm me-
 dici essentiam constituendum utilis est. &
 profectò quid aliud emolumentum affert i-
 sta peritia, nisi vt docti videamur verbis
 cū res non suppetunt, quod est stultæ am-
 bitionis; vel vt Arabicos, Græcosue intel-
 ligamus authores, quod est pœnè infructu-
 osum. Nam omnibus perlectis, quid aliud
 deportamus, obsecro: quàm pro vna veri-
 tatis spica, varios fasciculos errorum, ob-
 scuritatum, sophismatum, mendaciorum,
 antitheseon, & quædam experimētorum
 fallacium impedimēta? hæc multilingui-
 um laus erit, hoc ornamentum. sic descri-
 bi ipsos oportuit; quorum si quis in medi-
 cina vsus sit, ille erit profectò: quod libros

ex vno idiomate in aliud vertere nouerūt:
 id quod illorū in medicina peritiam non
 solum non augebit sed etiam valdè immi-
 nuet, dum rebus praxiq; omissis verbis da-
 re operā coguntur. Sed pergamus porrò:
Paracelsus Logices, Physices, Astrologia, Ge-
ometria fuit ignarus. Et quales illius Gale-
 nici consecratores dicam, quorum nemo
 ita suam artem definiuit, vt vel alijs vel sibi
 satisfaciat. Hic enim Artem esse contēdit:
 ille sciētiam: tertius vtramq; & neutram,
 sed quodam modo: quartus à fine: quin-
 tus ab opere: sextus ab euētu definit: septi-
 mus *Medicinam artem esse dicit curande sa-*
nitatis: sed illud etiam adiungit, *in corpore*
humano. quasi verò natura nomenq; medi-
 cinæ plus huic, quàm plantarum curatio-
 ni, vel etiam *κτηνιατρικῇ* conueniat. Physi-
 cam verò Ethnicorum, cum ne Christia-
 nis quidem in vsu sit, non solum Paracelso
 sed & mihi ignotam esse percipio. adde e-
 tiam nullum tam stabile in ea positum esse
ἀξίωμα, quin illicò vnico argumento, ceu
 figulorum ollulæ ad lapilli ictum franga-
 tur. Astrologi quoq; nostri prædicturi (si
 dijs placet) quo die, qua hora, quo mo-
 mento

mento morietur vel conualeſcet æger, exeuntes ad lapidem ipſi impingunt neſcij, tibijsq; fractis redeunt ridiculi domũ. Geometrarum quoq; tanta deprehenditur inſcitia, vt terræ marisq; ambitum ſe exactè tenere autumant, quantum tamen Londinum ab Iſelini diſtat oppidulo, iuxta cum ignariſſimis ſciunt. Quod verò Galenicus ille Paracelſum cœli terræq; odiũ vocare non erubeſcit, pudoris cancellos data opera tranſiliſſe videatur. Fuit enim cœlo chariſſimus propter ſummam aſtronomiæ peritiã; terrę, propter viuã mixtorũ anatomiã, è quibus nō illã cōmunem animulã, ſed aliã eduxit operatricẽ, varijs tincturis, aſtris, influētijs, poteſtatib. donatã. Hęc habui aduerſus Galenicũ calūniatorẽ in Chymiæ gratiam ſcribẽda: quẽ nunc multo auro emprurũ non diffido nihil ſcire Chymiſtam. etſi potiùs nihil tanti eſt, vt ipſum cōuitiorum pœniteat, cum ex fati votiq; placitis contumelioſus ſit. Id ſolũ colophonis loco adiungo atq; impero: vt ſi diutiùs pro foribus obgannire non abſtineat, quàm citiſſimè arceatur ab ædibus: vel ſaltem co mittatur, vbi ferrum ferro

atteri solet. Vale & quam nactus es Spartā, hāc orna virtute tua; sicuti fecisti antehac. Datæ Londino. 4. Kal. Febr. 1583.

PHILALETHI GERMANO Chymista S.

G Alenicum illum ab ædibus nolle arceri, iterum atque iterum scripsisti; nihil tamen reprehendentē in vobis præter id: quod ad medicinam perdiscendam sensibus solis confidere videmini. Næ ille si sciret sensuum de rebus physicis testimonium quantæ grauitatis sit, vel pisce taciturnior factus simile vobiscum & sentire & facere non erubesceret, Nam absq; sensibus fuisset, nullum naturæ motū vnquam cōcepisset ratio: horum autem ministerio à rebus singularibus ad vn̄ue: salioris naturæ cognitionē quasi manu perducebatur, variasque tum rerum tum scientiarū leges constituēbat. Vnde ratiocinatio ab Hippocr. nō immerito vocatur, *μνήμη τῆς ξυμβαλλή τῆς μετ' αἰσθήσεως λεφθέντων*. Nā *Διάνοια* petens à singularibus principiū, ad veritatem tandē perducit; quoties autem non ex euidendi obseruatione sed probabili rationis commento

pro-

procedit, hominē in viam seducit (ne ab Hippocr. verbo discedam) planē inuiam. Immo in physicarum rerum administrati-
 one Christus ipse totius rationis fons, plu-
 rimā fidē sensibus esse habēdā apertē do-
 cet. Nam quādo Thomas ille didymus de ^{20. Ioa.}
 Christi resurrectione nonnihil addubita- ^{27.}
 ret: φέρε, inquit, τὸν δάκτυλόν σου ὧδε, καὶ ἴδε
 τὰς χεῖράς μου. καὶ φέρε τὴν χεῖρά σου, καὶ βά-
 λεῖς εἰς τὴν πλευράν μου. καὶ μὴ ἄπιστος γίνῃς, ^{24. Luc.}
 ἀλλὰ πιστός. iterum, ψηλαφήσατέ με καὶ ἴδε- ^{39.}
 τε, ὅτι πνεῦμα σὰρκα καὶ ὀστέα ἔκ' ἔχει, καθὼς
 ἐμὲ θεωρεῖτε ἔχοντα. Vtinam tam verē prae-
 ceptoris exemplo physicam suam philo-
 sophi ad sensus regulam, non imaginatio-
 nis suae somnium instituissent. Quos si nūc
 interrogēs, quo tandē pacto sensibilia
 corpora ex elemētis non sensibilibus, aci-
 da ex insipidis fiant, non respondent, *veni,*
tange, vide, oculum digitumq. adhibe: sed, *cre-*
de, contemplare, imaginare, illudq. Aristoteli-
cum perdisce; δὲ μὲν τὸν μανθάνοντα πιστεύειν.
 illiberale profectò dictum, tantoque phi-
 losophiae patrono nimis indignum. Nihil
 enim medico tyroni accidere queat cala-
 mitosius, quàm suae artis fundamentum

substruere credulitatem, cogitationem, opinionem, incertitudinem, arenam, paludem, Syrten. Ne quantum præstaret illos imitari viros qui ædificaturi varias aspiciunt domos, probè, politè commodè examussim factas, vt ab optima quaque petito exemplo, sibi ipsis simile hospitium suo vsque sumptu ædificent. Quare hinc basis illinc parietum, aliàs zetarum, attriorum, frontispicij, imbricamenti faciunt electionem: si quid etiam de suo inuenire & addere valent, id deputatur in lucro, sibi que honori maximo futurum est. quid ni enim sicut architecturæ magistri multa eaque præclara addiderūt patribus nostris ignota, sic etiam in medicina se habeat adeo æmula architecturæ, vt eadem curationis methodo vtantur. Noli igitur vel antiquissimo medico, nedum ipsi quidem Apollini vltra credere, quàm veram dederit ἀπόδειξιν, sensuum calculo & longæ observationis voce sancitam. Immo Galenus ille Galenicorum deus disertis verbis affirmat contra Sophistas, ex sensu & per sensum omnia physica axiomata originem duxisse, & ab iis si recesserimus, nullam superfu-

turam demonstrationem. Sed opponit, *haud tutum esse sensuum sequi arbitrium, quod his tam frequenter ac faciliè imponitur. Nam organo male affecto, medio infecto, obiecto propius longiusve collocato, modoq; recipiendi inepto, non aures tantum, sed lingua, nares, cutis, ipsiq; adco oculorum excubitores falluntur. Immo inter mille viros sanitate (quantum iudicare licet) fruentibus, pauci perfecte sentiunt, & eodẽ modo vt alii. quod enim huic acidum, id alteri austerum est; quod uni acre, id duobus amarum videtur, &c. Age: principiũ quod petit Galenicus, disputationis gratia concedamus. nunquam tamen persuaserit alicui sensus tam planè hebetes fuisse, vt salua mente albedinem niuis, caliditatem ignis negaret. Vel si id faceret, ecquid indignum putes, qui insanorum cruciamentis affectus virgis vndiq; teratur? sed iterum obiicit, *turpe esse ratione exclusa sensib. committere iudicium*: id quod fieri à nobis, nunquam ne per insomnium quidem venit in mentem. Sed veluti prætor in foro suam non præcipitans sententiam, ex sola testium oculatorum relatione in hanc vel illam partem inclinat: ita etiam in medicis*

cōtrouersis rationem iudicare volumus; sed ex solo sensuum præscripto, qui illi nūclorum loco & vice proxenatarum inferuiunt. Atque propterea materiale corporis humani causam terram esse statui-
 mus, triplici illa salis, Mercurii, sulphurisq; substantia ditatam. non quia affirmat Pa-
 racelsus, Isaacus, Geber, sed quia videmus, tangimus, gustamus illa tria principia, at-
 que sensu docente agnoscimus esse vera. Huius autem doctrinam cum non admit-
 teret Galenus, audi in quàm turpes erro-
 res decidit imprudens. Nam cum diu a-
 pud priscos controuersum esset, saporum
 differentiaē vtrum ab elementis, an pecu-
 liari quadam materia nascerentur: Gale-
 nus hoc totum elementorum mixtioni
 attribuendum esse dicebat. Vnde igitur
 aciditas Galeno? nempe ex imbecillo ad-
 modum calore, medicamentum alimen-
 tūmve mutante, non vincente. Quemad-
 modum in malis nondum maturis atque
 ciborum semicoctorum ructibus videre
 est. Verūm quid aceto radicato, quid vi-
 trioli sulphurisq; oleo acidius percipi
 queat? quorum vtrumque calore tam ex-
 tre-

1. De fac.
simpl.

7. De sim.
fac.

tremo constat, ut propterea vocari cœpe-
 runt ignea medicamenta. Nunc ad dulce-
 dinem veniamus, quæ secundum Galeni <sup>7. De
simpl.
fac.</sup>
 placidum, à temperatissimo calore pro-
 creatur: siue is insitus fuerit (ut in melle) si-
 ue acquisitius, ut omnia quæ ab igne dul-
 cia redduntur. Tamen cerussæ liquor &
 butyrum vitrioli (utrumque per dulce cor-
 pus) igne violentissimo dulcedinem com-
 parari posse satis eliciunt. Denique insignis
 illa opii amaritudo, saporem hunc non ex
 immodico tantum calore nasci disertè mō-
 strat; id quod Galenus nescio an probavit <sup>4. De
simpl.
fac.</sup>
 magis, an finxit. Sensuum quoque spreto
 iudicio, pulsus portas fecit Galenus. Spon-
 dæos, Pyrrichios, tribrachos, Doricè, Ioni-
 cè, Sybariticè ludentes. Aliquando etiam
 Lydiam ipsis musicam, ascribit, spondæis
 pyrrichios, trochæis iambos, dactylis ana-
 pæstos miscentem. varias denique eorum re-
 ciprocationes aliis fortè nominibus sed
 multo obscurioribus diuidit. Hinc videas
 approbandum esse, non quicquid Hipp.
 Galenus, Auicenna, Paracelsusue scribit:
 sed cui sensus, oculi, experientiæ attestan-
 tur: à quibus omnis physica cognitio (si

quæ modo sit) tanquam ex ipso latice depromitur. Adhibe igitur multam rutam, chelidonium, feniculum, eufrasiam, multa oxydertica remedia, ne oculi hominum auctoritate quasi lemarum sordibus infecti, aut nihil, aut parum, aut perperam medicinam intueantur. Noli inquam permittere, ut te cuiusquam vinciat auctoritas, sed singulorum opinionibus gustatis, corrigas quæ falsæ fuerint, vel confirmes veras. sic tandem Theoriam Praximque medicam assequeris, non qualem illi somniarunt, sed quam ipse αὐτοθεασάμενος cognoscis esse bonam; Chymistam denique te prestes; singula videas; retine quæ tua sunt: homogenea (inquam) ab heterogeneis accuratè segreges. Quid enim medico cum causis animæ? id Theologi disputent. coqui etiam saporum; pictores colorum; vnguentarii odorum; Musici sonorum causas examinent. Tibi verò satis fuerit nouisse, quid prosit & quid noceat tuo subiecto. Has enim secundas qualitates sensus exteriores afficientes, nunquā vel in primarum mixtione, vel in alio quocunq; philosophorum figmento verè videris.

Quin

Quin potius (si hoc videre gestias) vegetabilium, animalium, metallicorum viam fac anatomiam; & vbi tinctura, sapor odorve habitat, vbi venenum, vbi Theriaca medicamentorum delitescit, non alienis sed tuis oculis perspicito. Digna quidem prouincia in qua omnes medici consecretant, & plena exercitationis. Atque ita sensuum iudicio medici opinionem consonam esse debere liquidū reddidi, ipsumque Galenistam idem mecum dicturum esse non dubito. Vale. Data Londino 6. Idus. Febr. 1583.

PHILALETHI CHY-
mista S.

PEtis à me, Philalethes, quid faciet in hac authorum sectarumque varietate medicus nouitius, quem potissimum sequetur? Hippocratem, Galenum, Auicennam, Paracelsum, hunc, illum, omnes, an nullum? ardua mihi crede quæstio & plena difficultatis. tamen si res meo staret suffragio, ego omnibus medicis assentirer, quantum illi veritati: tantumque illos relinquerem, quantum illi hanc. Aliàs si quidem Phalaridis imperiū, nō iustitiæ placi-

tum videretur, quos Natura liberos pro-
 genuit, eos ceu nuper ab hasta emptos vni-
 us philosophi iudicio emancipari. Nam
 cū iuxta illud Hippocratis, Medicina lon-
 ga sit, vel cum Medici ætate, temporis cur-
 riculò, iudicij difficultate, aut cum experi-
 menti incertitudine collata: quinam per-
 suaderi mihi sinam, ab vno immò à cun-
 ctis Medicis sumnam manū ita fuisse ad-
 hibitam medicinæ, vt nihil addi adimiq;
 vel queat vel debeat? Tamen video ple-
 rosq; auitæ doctrinæ nimios æstimatores,
 ad Patrum authoritatem veluti Meniam
 aliquam columnam confugere, atq; illud
 Pythagoreorū telum asciscere, αὐτὸς ἑφα.
 Hac verò collabente à pontificijs opẽ quẽ
 runt, illaq; confestim accersunt subsidia a-
 sinorum: *Crèdendum est patribus, conciliis,
 successionibus Asclepiadarū, familijs Arabum,
 consuetudinibus & ritibus Academiarum &c.*
 Cum tamen vnicū Heluetium illis omni-
 bus & meliora sciuisse & plura inuenisse,
 medicamenta vel Paracelsi comprobat
 exemplar. immò ipsum medicinẽ vestibu-
 lum localem anatomiam tantæ amplitu-
 dinis esse video, quantam quingentæ O-
 lym-

lympiades Medicorum satis non sunt cōplexæ. Quis enim Aristotelis illud commentū non videt, neruos aliquot à cordē ducere originem? quis Platonis nō deridet errorem, duplicem in pulmone meatum constituentis: alterū potus cibiq; in ventriculū, alterū verò aeris delatorem? Hippocrates quoq; & Galenus, (quorū illē medicinam texuit, hic diduxit) in variis falsissimisq; paradoxis, à Vesalio Anatomicorū sole deprehensi sunt. Tamen Vesaliū Columbus corrigit, Columbū Fallopius, vtrumq; præceptor meus charissimus Felix Platerus, qui post tot seculā quædā in situ, v̄su, & cōformatione partiū & nouā & pulcherrima notauit. Atq; sic Alpham Beta, Betam Gamma emendat: nec quidem Omega tam diligens erit Anatomista, quin vel alterius stylo, vel saltem à seipso corrigetur. Ecquid iam verisimile est (Philalethes) nihil addendū adimendumue medicinæ, in cuius portu tot errorum scopuli reperiuntur, in quos cæca adolescentia prima quaque nauigatione impingat? sed soluamus altius, & physiologiā paulisper intueamur. cuius sum-

ma hæc est: *humanum corpus ex humoribus, humores ex elementis, elementa à principiis venisse.* Si verò interrogas ex quo humore factus sit homo: respōdent, ex bile, vtraq; pituita & sanguine in cōmunē quēdā humore semen dictū coeūtibus. Sin vltcrius scisciteris, vtrum corpore humano semen, an illud semine natura antiquius sit? Deus bone, quantā oscitantia hīc videas, quantam timiditatem? nam si primum asseuerant, effectū efficiente prius esse oportet, quod est absurdū: si verò negant, tū homo aliūde factus est quam ex semine humano, suāq; dirruēt mūdi æternitatē, quā ipsi totius suæ religionis fecerāt fundamentū. Nec aliter in elemētorū doctrina se habet: Nā elemētū alij vnū esse volunt, alii multiplex, alij infinitum, innumerabile, immobīle. hi quoque duo, illi tria, isti quatuor, alii octo esse affirmant: omnes tamen in hoc mutuis vocibus cōspirant, nullum elementum, quod reuera tale sit sentiri à nobis posse; omnique sapore, colore, atq; odore destitui. Si verò tum interrogas: quomodo insipidorum mixtio elemētorum, tot saporum colorumq; species producat,

ducat, ad Galeni illum clypeum concurrunt: *Vbi sensus hebescit, ibi ad rationem cendiuiorem hominis partem eundum esse. Sensus quippe brutis unà cum homine communis est: rationis autem lucidior ille oculus ea percipit, quæ sensus aciem nimis hebescentem effugiunt.* atque ita versatilis philosophi responsione (qua quiduis probare, quiduis etiam diluere proclive sit homini impudenti) quæstioni tam necessariæ & nobili autumant satisfactum. Verùm si Galenus Mosi Christique scholam irrideat, quòd in ea theses aliquot habentur nulla constitutæ demonstratione, idque in rebus physicis, vti ipse affirmat: quanto magis iure Galenicam physiologiam cachinno sibilisque excipere oportet, quæ etiam in physicis rebus non sensuum demonstrationem sed imaginationis somnia testatur? Immo vt æqua magis fiat ἀναλογία, si Hippocrati non credendum cēset Galenus, tanquam testi, sed demonstratori, quid ni & nos pari libertate ipsum demonstrantem audiamus, & vicissim reiiciamus delirātem? sed interrogas: *Ecquid antiquis illis scriptoribus, an neotericis potius confidendum sit?* Ianè istis

2. De
simpl.
fac. cap.
2. & 3.

2. Lib.
de puls.
diff.

Lib. q.
animi:
mor:
seq. tem-
per. corp.

recentioribus. Quòd in hac senescentis mundi ætate, non solum linguarum dona, sed quoque methodum adepti sumus insignem, cuius beneficio veterum scripta non confusim & sicuti nascebantur tumultuario opere consarcinata, sed elegantè disposita, suis locis, capitibus, artubus distincta, & variè illustrata legimus, videamurque hoc pacto coruo similes in fastigio turris sedèti, qui licet ad terrestres coruos collatus, passerulum repræsentat, tamen ob situm elatiorem longius prospicit quàm illi, & accuratiùs iudicat obiecta. Esto enim, nihil a neotericis dici, quod nō sit dictum prius: nihilominus quæ rectiùs, planiùs, elegantius, apertiùs, fusiùsue aut subtiliùs dicuntur, multa inueneris. verbi gratia: Chemiam tractauit Mercurius ille ter maximus, circa Mosis ætatem natus: sed ita obscurè, vt capere eū nec coeui nedū Latini potuerint. Successit postea Zoroastres, Salomo, & post ipsum Arabum familia, quorum tamen ante Gebrum, nemo quod scimus Chemiam definiuit, diuisit, suisque organis, actionibus, materia, effectibus locupletauit. Huic tamen Paracel-

celsus aliique præclari Chymici tam sermonis perspicuitatem quam rerum ordinem addiderunt, verèque affirmare possunt illud de se ipsis : *Ditavit ille nos, & nos illum*. Immo licet Hippocrati tanquã medicinę conditori & parenti, Galenus summum deferat honorem, nihilominus passim sermonem eius arguit veluti non exactum, improprium, obscurum, inconditum, indistinctum, & modo mancum, modo contra superfluum. Est quando diligentiam in eo desiderat, confusam & inordinatam traditionem reprehendit : nonnũquam ineptitudinis, obliuionis, erroris, & mendacii tacitè insinuat ; & circa pharmaca pleuriticis danda, ab eo totus dissensit. Rem tibi lepidissimam narrabo, Guillelme mi, de quodam Galenico idololatra, vetustatis admiratore. Hic cum damnaret quidquid non vetus esset, & à Galeno ipso vel Hippocrate conscriptum, obtuli illi Hippocratis De elegantia libellũ Germano cuidam falso inscriptum : quod perlectũ, stultitię, curiositatis, ἀταξίας, & obscuritatis accusabat : addito etiã conuitio cynicę morositatis. Verũ cũ Hippocratis

1. Lib.
De vñ
part.

2. De vict.
rat. in
act.

nō Germani scriptū fuisse prolatistabulis ostenderē, erubuit miser, & vitę infamięq; satur aufugit. Suadeo igitur vt nullius addictus iurare in verba magistri, te nemini prorsus emancipes scriptori, sed vt veteribus & præcipuē neotericis diligenter examinatis, tantū illis tribuas, quātum illi demonstrationi, sine qua quicquam affirmare quā ridiculum sit, vel Geometriæ exēpla ostendunt. Bene vale: & me quātum diligis, tantum fac vt valeas. Datæ Londino. 3. Non. Maij. CIO. IO. XXXII.

PHILALETHI

Chymista S. P. D.

SÆpius me percontatus es, Philalethes, quum nemini me addici patiar authori, an sequeretur ipse me, plusque meo iudicio quam omnium classicorum placitis tribuerem? nolo hoc. Sed naturæ lumine ducar, non cæco illo naturæ auspicio quo nitimur in vetitum, & veritate relicta comitem nobis iungimus errorem. Quid igitur per naturæ lumen intelligis? ecquid natura artem imbibimus, vel ex traduce consequimur scientiam? neque hoc statuo. Nam recens nati tabulæ

læ abraſæ ſimiles videmur, in quibus ſcilicet actus ſcientiarum non inſcribitur, ſed potentia quædam exigua fati benignitate & præceptorum obſtricatione temporisque decurſu adoleſcit. Quid eſt igitur lumen naturæ? primæ naturæ ſiue integritatis iudicii veluti fulgur quoddam, non innatum ſed inditum nobis à Deo: quo falſum à vero, diuiniore mentis oculo diſcernimus. Etenim medicos duplices eſſe puto: alios Theodidactos, quales erant Apoſtoli: alios verò mediatè iſto fulgure illuminatos, quales antiqui fuerant Chemiſtæ. Atque quemadmodum fulgur nunc ab hac cœli plaga, nunc verò ab illa emicat: ita etiam naturæ lumen aliàs atque aliàs ducit originem. Nunc à Deo immediatè veluti in Adamo, qui dum integer vitæ ſcleris que purus eſſet, nō nouit tantum, ſed etiam nominauit vniuerſa. At poſtquam immigrauit Protoplaſtus in ingenium ſuum, atque ab illo pietatis ſtatu flexit, actum eſt de primo iſto lumine naturæ, eiſque loco phantaſia, error, opinio, tam ipſum quàm omnem poſteritatem ſecreto quodam ſeminis contagio in-

fecit. Hinc factum est, maximam partem
 eorum quæ scimus minimam esse partem
 eorum quæ ignoramus: immo reuera ni-
 hil sciri effecit si scientiam perfectam rei
 cognitionem esse definias. Hanc tamen
 perfectionem proximè assequuntur ij,
 quotquot albicante illo & clariore natu-
 ræ fulgetro carentes, vicario eius fruun-
 tur, densiore illo quidem & crassiore, sed
 tamen ad veritatem iter commonstrante
 nobis, & quodammodo indigitante. Exē-
 pli causa: Innocens ille Adamus, sui ad-
 eoque cuiusque corporis essentiam, na-
 turam, hypostasim, efficientes, formales,
 instrumentales, finales denique causas
 ex inspiratione diuina perfectè nouit: nos
 verò idē quoq; noscere videmur, sed qua-
 si per nebulam, & in parte, vti loquitur
 Apostolus, id est, per analogias, similitudi-
 nes, collectiones, & macrocosmici cum mi-
 crocosmo cōparationem. Hinc dicimus
 hominis corpus ex solo sulphure, Mercu-
 rio, atque sale constare: non quia tam per-
 fectè id noscimus atque Adamus, sed quia
 tam naturalis quam artificiosa corporum
 omnigenorum resolutio, rem ita se ha-
 bere

bere ostendit. At quomodo persuasum
 est nobis verum esse illud ἀξίωμα com-
 poni corpora ex ijs primū, in quæ vl-
 timo soluuntur? Quin illud numeri at-
 que syllabæ palam faciūt, qui vt vt fuerint
 compositi, tot sigillatim vnitates contine-
 re videas resolutos, quot compositi reprę-
 sentabāt. atq; ita à corporibus ad acciden-
 tia, à natura ad artem, atq; ab vna arte ad
 aliam facta analogia, principia illa tria ve-
 ré eliciuntur, nunquam vel cuiusuis Gale-
 nici conatu ruitura. Etenim naturę & artis
 vna eademq; lex est. Omnia enim similia
 sunt, quātumuis dissimilia, & omnia con-
 cōrdia, licet discordia videātur. Quare nō
 immerito Hippocrates totius naturæ dis-
 pensationē operationemq; in nobis, ab ar-
 tium scientiarumq; effectibus comparati-
 one facta ostēdit. Nam re vera spiritus ser-
 rantium partium substantia, telariæ, genera-
 trix facultas plastices, temperamentum
 figuli, concoctio aurificis, auditus Musici,
 sapor coquinarum, diætā architecturæ a-
 deo æmula est, vt siue actionem spectes, si-
 ue finem, vix vllum videas discrimen. Im-
 mō naturam hominibus versipellem ani-

Vide.
 Hipp. Lib.
 I. de. diet.
 cap. 8.

mum indidisse, ex eo probat Hippocrates,
 vt alia sentiant, alia loquantur, alia faciant,
 & iisdem de iisdem contrariam subinde
 tradant disciplinam : quòd artes quæ-
 dam deceptorix reperiuntur, vtpote palæ-
 strica, mercatoria, potatoria, luloria, quas
 dextrè facientem admiramur omnes, &
 virtutis esse putamus : causam tamen non
 intelligimus, ab ipsa naturæ similitudine
 profectam. Hanc naturæ artisq; conso-
 nantiã si Galenici satis conciperent, nun-
 quam negarent in corpore humano mo-
 litores, pistores, coquos, archæos, chymi-
 stas, destillatores, baiulos, portitores, ob-
 sonatores, Musicos, Parmenones, Getas,
 Claratas, Dædalos, sculptores, aurifices
 fullones, telarios, nuncios, fabros & archi-
 tectos reperiri posse : multoq; minùs taliũ
 verborum authores plusquam cynicè irri-
 deret. Nonne sapientissimus ille velex Dei
 oraculo Ecclesiastes, manus domi custo-
 des, ossa athletas, dentes molitores, oculos
 speculatores, labia ostiarios, aures excubi-
 atores, asperam arteriam symphoniacam,
 capillos amygdalum, medullam spinæ fi-
 lum argenteũ, venas hydriam, hepar fon-
 tem,

tem, cor rotam, pericardium cisternā vocavit? At quare hoc? Sanè ex lumine naturæ, quo nihil cum his partibus, si officium vsumq; videas, aptius cōferri posse satis animaduertit. Vis tibi errores aliquot Galenistarū aperiā, in quos ob spretum naturæ lumen ad perpetuā nominis infamiam inciderunt? audi vnum, eumq; nobilem & insignem. Cum Deus hominem ex humo factum dixerit, quid aliud voluit (Philalethes) quā vt materiæ humanæ cognoscendæ studiosus, substantiam humi perenderet, eam distingueret, secaret, examineret? illic nimirum humani corporis principia inuenienda esse insinuans, non alibi reperienda. hoc lumine Galenici carentes, ignis, aerisq; regionē ascenderunt, in aquas descenderunt, atq; ita terra cum illis mixta hominem non ex Dei præscripto sed placito phanthasię commento fabricauerūt. Quinetiam cum in terra neq; sanguinem vident, neq; pituitam, neq; bilem atram aut nigram: Hominem tamen & lege & natura nihil esse aliud affirmant, præter hæc. Paracelsus contra alijq; insignes Chymici, cum à Deo tantum lumi-

nis haussissent, materialia hominis principia in terra vnde prouenerat abscondi: continuo atq; improbo labore venas eius dissecuerunt, viscera aperuerunt, ossa fregerunt, medullas colligauerunt, nullum non lapidem mouerunt ut quæ illuc habetur corpora diligenter examinerent. Tandem verò Pyrotechnicæ Alchymicæq; beneficio, longisq; suis & plusquam Herculeis laboribus, nihil simplex in terraprehenderunt, præter *vaporosum, inflammabile, fixum*: nihil mixtum, quod non ex iisdem simplicibus componeretur. Quare hominis quoq; principium duplex esse constituunt: alterum volatile, alterum verò fixum. Volatile vicissim duplex est: primum vaporosum, quod Mercurius dicitur, secundum inflammabile, quod sulphuris nomen obtinuit. Mercurius est corporis principium vaporosum: per se ipsum interminabile, humidum, liquidum, naturalis balsami vehiculum: sulphur cum sale, ceu aqua cum arena calcem incorporans. Sulphur est corporis principium inflammabile, pingue, leue, æquale, vitalis balsami fomentum. Sal verò est fixum corporis principium, pondus, soliditatem, roburq; maxi-

ximum cōcilians, neq; ferro neq; igni cedens per se. Horum principiorum differentia duæ sunt: aliæ domesticæ, cum ad seipsa, aliæ exotericæ, quando cū alijs conferuntur. Domesticum in homine principium appellatur, quod ad corpus in integritate seruandum natū est; at verò quod id ipsum corrumpit, dicitur peregrinum. Hoc autem vel innascitur à parentibus & perpetuam valetudinem efficit, aut à nutrice & diæta externa contrahitur, corporisq; dyscrasiam inducit diuturnam. Vt autem peregrini domesticiq; principij naturam quamq; particularem rectiùs examinemus, omnia sulphura, sales, Mercuriosq; omnes inuestigare operæ pretium erit: vt ita sulphur sulphuri (ceu purpuræ purpuræ) collatum, naturale à non naturali faciliùs distingui queat. Sulphur autē omne in maiori mundo (qui est lumen minoris) vel est perfectè, vel est imperfectè, animatorū. perfectè animatorū animalium, vegetabiliū: imperfectè, Mineraliū. Animalium deniq; & vegetabiliū sulphur, vel natiuū reperitur vel artificiale. Natiuum quod ipsa eijcit natura sensibusq; tractan-

dum emittit: qualia sunt, pinguedines omnium animalium exudantes, cerificia apum, resinæ arborum, lacrymæ laricis, pinus, terebinthinæ, abietis, styracis, piceæ, lentisci: &c. gummi cerasorum, laccæ, laserpitij, panacis, cedri, thuris, myrrhæ, &c. Artificialia verò, sunt olea, spiritus ardentes, resinæ lacrymæ, & gummata combustibilia, ex vtrisque, tam animalibus scilicet, quam vegetabilibus extracta. Mineralia verò sulphura, artis quoque & naturæ beneficio eliciuntur. Naturæ, ut succini, bituminis, oleorū, pinguedinū, sulphurum, omniumque corporum vinctuosorum sub terra spontinæ efflorescentiæ. Artificialia sulphura quoque varia eliciuntur, ex pyrite, gagate, carbone fossili, bitumine, terra solis, atque omni denique metallico, in quo sulphur illud vstibile reperitur. Atque hætenus de sulphuris speciebus, quæ tamē plures in maiori mundo siue arte, siue naturæ factæ neutiquam inueniuntur, quàm in totius humani generis corporibus. Nam uti animal ab animale, arbor ab arbore, minerale à minerali differt: ita etiam non eadem hominū facies, non color, non sym-

me-

metria, non eadem textura, non idem per omnia sulphure esse liquidò constat. Nam quos Galenici melancholicos vocant, illi picco, Napthalio, nigro, denso, impureq; sulphure abūdant. Biliosi vero, cereo, croceo, succinco, abietino, flauo, pellucido, subtili. sanguinei, amarāthino, caryophyllato, rubro, claro, coccineo, medij temperamenti. Phlegmatici denique, sulphure etiam præditi sunt, sed cerasino, arabico, masticino, gummoso albo, compacto, grumoso, glutinoso, crasso, & difficulter flammam concipiente. Præterea, veluti in maiori mundo quædam sulphura benigna sunt & apta nutritioni, quædā sola medicamentosa; ita etiam in corpore humano se habet, quod dulci sulphure sulphureas enutrit partes, peregrinū verò in vesicā felis demādat, & loco stimulantis pharmaci utitur ad alui seductionem. Adhæc, sicuti in maiori mundo, quædam sulphura calidissima, ut petroleum: quædā contrā Narcotica reperiuntur, ut hyoscyami, opij, vitrioli: ita quoq; petroleum in corpore reperitur febrium tam vniuersalium quam particulariū, internarū quam externarum

author: & vicissim sulphur vitrioli atq; opij, in vteri suffocatione, lypothymia, malo mortuo, & lepra alijsq; morbis conspicitur. Atq; vti quædam sulphura crassissima sunt, quædam subtilia, quædam media (vti carbo fossilis, sulphur colliquatū, succinum exaltatū inter fossilia; pix naualis, resina, terebinthina, inter vegetabilia; seuum, pinguedo, adeps, inter animalia; illæq; multiplices spiritus vinosi graduationes inter artificialia, satis superq; mōstrāt) sic etiam diuersa in hominibus sulphura reperiuntur, quorum crassities longas febres efficit, subtilitas verò breuiores. Et quemdamodū carbo fossilis non diuturniorem solummodò, sed quoq; vehementiorem flammam obtinet, quàm lucerna: quòd hæc subtiliore, ille vero densiore fruitur alimento: pari ratione, idem de febribus argumentū narrari potest: quarum sulphur aliquando spirituosum est, vt in Ephemera: aliquando crassiusculum, vt in synochis: sæpè etiā valdè crassum, vt in tertianis, aliquādo crassissimū, piceū & carboni fossili simillimū, vt in quartanis. Hinc illę paroxysmorū, febriū, crisiūq; varietas

tates, longitudes, breuitates, trāsp̄lan-
tationes, mixtiones, & veri canones e-
mergunt. Id si vidisset Hippocrates, non
solum plurimas febres à sulphurea qua-
dam materia prodijſſe aſſeueraret, ſed
vniuerſim omnes nullamq; vſtionē, vel
aereis illis ſpiritibus; vel etiam pituitofis
attribuiſſet. Quis enim aerē vel aquam
vel etiam terram, omni ſulphure vacan-
tem accendi vnquā deprehēdit? Quod ſi
id nunquā in maiori mundo vidisti, quo
tandem pacto inueneris in minore? Ve-
rū ex iaculo ardente, fulgetro, cande-
la, comētis, capra ſaltāte, ſcintilla, ſtellis
cadentibus, igne fatuo, Helena, Gemi-
no, alijsue meteoris ignis inſtar exarde-
ſcētibus perſuaſum ſit tibi, aerem quan-
doq; flammam concipere poſſe: nimis te
ipſum credulum oſtendes non attēdens,
illorum flammam haud ex aere, ſed pin-
gui quadam exhalatione originem cœ-
piſſe: ꝑ cuius craſſitie, ſubtilitate, copia,
inopia, clariore, obſcuriōre, pellucidi-
ore, opaciore, breuiore, diuturniore
omnes illæ ignitæ in aere typulæ eua-
dunt. Ad hæc, cū caloris non ſit accendi,

sed accēdere quicquid comburi potest: cur febrem calorem accēsum esse definimus, idq; sæpè ex pituitosa, aut terrea materia, quum tamen neutra omnigeno sulphure destituta vel tantillum poterit accēdi? immo aquea omnia (cuiusmodi pituitā facimus) nec nō verè terrea corpuscula, ad ignē extinguendū nata sunt, tantū abest vt ipsum nutriāt superinfusa. Solū igitur sulphur omnis sublunaris ignis alimentū & sedes est: reliqua vero omnia non nisi ex huius cōmixtione vel (vti dicā) vicinitate, incalescūt. Atq; hæc de sulphure. Verū vt alię corporis partes *κατ' ἐξοχὴν* sulphureæ appellātur, nēpe seuum, omētum, adeps, pinguedo, glandulæ, medulla, bilis, & quod hīc illic cernitur oleosum: ita quoq; nonnullę Mercuriales appellantur eodem modo, vt aqua & pituita vulgò dicta, earumq; receptacula communia; nonnullæ itidem saliares, vt ossa, viscera grauiora, ligamenta, cartilagines, tenaciores membræ, serum, renes, vngues, capilli, &c. in quibus per artem resolutis plus salis quam mercurij aut sulphuris reperitur.

Si

Si autem mercurij in corpore humano actionem planeq; mirabilem reuolutionem discere cupias, id ipsum in maiore mundo particularis naturæ speculo primum intueri oportet: vbi quot aquæ, quot liquores incombustibiles, tot quoque Mercurij inueniuntur. Nec non in nobis aliter se habet (philalethes) quorū alij mercurio minerali, alij vegetabili, alij animali abundant. Atq; ex mineralibus, huic Solis, illi Lunæ, tertio Veneris, quarto Iouis, quinto Saturni, sexto Martis, septimo Mercurij Mercurius infigitur. ex vegetabilibus verò, hic melissæ, cardui, saluix, betonicæ; ille satyrionis, chelidonix, valerianæ, brassatellæ Mercurij plurimum obtinuit. ex animalibus autem, Mercurius leonis, tigridis, catuli, vaccæ, equi, vrsi, Elephāti, nūchæ; nunc illuc communicatur; si non ipsamet essentia, viribus tamen ijsdem insignitus. Mercurius deniq; hominum, vel naturalis est, vel peregrinus. naturalis dulcis mitis, neque calidus neq; frigidus extra secundū gradum, nec quātitatem debitam excedēs. peregrinus verò instar ar-

genti viui tam extremę caliditatis quàm
 frigiditatis dyscrasia pollet, & ad putre-
 faciendum, rodendum, debilitandum,
 eneruandum, ipsaq; ossa totius humanę
 fabricę stabilimenta labefactāda com-
 paratus est. Hinc igitur apoplexię, para-
 lyses, fatuitates, rhemnata, hydropes,
 leucophlegmatix, oedemata, Ptyeli-
 smi; stomachi, cerebri, cordis, vesicę,
 spinalis medullę aliarumq; partium in-
 undationes nascuntur, non ex pituita,
 aut phlegmate, quę præter nomen ficti-
 tiū nihil sunt. Atq; his de principio cor-
 poris volatili expositis, nunc venio ad sa-
 lis, seu fixi illius principij anatomiã. Est
 autem sal quoq; vel domesticus, vel pe-
 regrinus: ille gratus, mitis, præseruans à
 putrefactione, vnitatis vinculum, & pro-
 prium quasi condimentum sanitatis. hic
 verò (nempè peregrinus) acrimoniã,
 aciditatem, ardorem, amaritudinem, e-
 rosionem, puncturam, stimulationem,
 perforationemq; ex satorum seminis vi-
 tio, aut propria intemperantia contraxit,
 omnium tam internorum, quàm exter-
 norum vlcerum, exiturarum, apostema-
 tum

tum cutisq; apertionū author. Salis autem species in homine variæ dicuntur. Alij ex mineris orti, arsenicales, ferruginei, venerci, vitriolati, aluminosi, gemmei, ammoniaci, crystallini; Alij à plâtis sumpti, vrticales, persicarij, piperini, opiat, tartarei, aronici, zingiberini; &c. Alij verò ab animalibus, viperini, ferini, lupini, canini, stellionares, cantharidei, scorpionei, tarátulares. &c. nec sanè immeritó. Nā veluti aliter afficitur homo à tarátula morsus, atq; à stellione aut viperâ: sic etiam quidam sal risum, titillationem, pruritumq; quendam gratissimum excitat; alius verò ingentem corporis dolorem, inquietudinem, insaniam, hydrophobiam; vt hominem non à stimulo interno punctum, sed à cane rabido extrà vulneratum existimares. Atque vt dypsades morfu suo ingentem sitim, Hæmorhus sanguinis fluxum, Amphibæna inflammationem, Basiliscus mortificationem, Aspis soporem, Dryinus χαρδωγµόν, stellio liuorem, salamādra congelationē, solifuga pestem, phalangia leguminaris phlyctænas, scolo-

pendra putredinem inducit: sic etiam
sal hydropicus, menstrualis, pleuriticus,
phagedænicus, mercurialis, antrhaci-
nus, furuncularius, narcoticus, pestilen-
tialis, herpeticus, gangrænatus, eadē fa-
bit symptomata, vbicumq; in nobis cen-
trum hospitiumue sibi post factam sepa-
rationem comparauit. Nam quandiu
mercurialibus liquoribus hîc illîc in ve-
nis vâsisq; latioribus continuò remean-
tibus immergitur, tandiu tum propter
motus assiduitatem centriq; incertitu-
dinem, tum etiam liquoris sibi contra-
rij miscellam exulcerare corpus non po-
test. Id nobis ostendit vinum: quod re-
cens mulsû suauitate dulcedineq; sua
eximia Nectar refert diuinû, & mirum
in modum linguæ palatoq; ebrio forum
lenocinatur; facta tamen partium spiri-
tuumq; separatione tartarû falsissimum
atq; acerrimum, nec non acetum acidis-
simum & plane corrosiuum eijcit. Cum
igitur liquorum in corpore fluentiû nu-
merus infinitus sit, haud mirum si tam di-
uersæ saliû quoq; facies, atq; operatio-
nes appareant, varias vlcerum species,
for-

formas, figuras, varia quoq; symptomata parientes. Atq; ita lumen naturæ nihil esse, quàm magni illius mundi cum corpore microcosmico analogiam, luculenter vides. vides etiam artem naturæ, naturam arti consentire, eandemq; esse vtriusq; operatricem, quamuis Galenico ingenio (aliter enim sensit Hippocrates) res multum non solum dispares, sed etiã oppositæ videntur. Bene vale: meq; vt soles dilige, animo meo charissime Philaletes. Data Londino. 15. kal. Quintilis, 1583.

ENDYMIONI LVDDIPO-
lenfi Chymista S.

Peregrinationem medico in tua patria futuro haud esse necessariam, multis probare nitetis, Endymion: nec tamen interim attendis, quantam tuo quæ semper prædicas Galeno, & quàm grauē inflixisti securim. Nam licet cum ipso tu natam medicinam existimas & perfectam esse, tamē varia in Ægyptum, Alexandriam, Palæstinam, Cyprum, Lemnon, Romamq; itinera suscepit; nunc vt conferret cum medicis, nunc vt op-

Vide. auth.
vitæ Gale-
nicæ & i-
psam Gal.
9. Lib. de
simpl. fac.

Et lib. de.
comp.
med. sec.
gen.

Plin. lib.
29. cap. 1.

pobalsamũ, terram lemniam, aliaq; domi non nascentia medicamenta ad gentiles suos deferret. Hippocrates quoq; ille Cous paulò ante Pelopõnesiacũ bellum, cum Medicinam præceptis indigere intelligeret, variè peregrinatus est, & nõ solùm ex Aesculapij fano, sed etiam ab omnibus philosophorum medicorumq; vocibus, historias curationesq; morborum exscripsit, atq; ita ex multiplici experiẽtia observationeq; diligentia Medicinam primus progenuit. Peregrinationis suę testes locupletissimi sunt Epidemicæ illæ vel potius Apodemicæ observationes, quibus ita profecit, vt nullus adhuc Galenista inuentus sit, qui Hippocratis peritiã attingere, nedum superare potuerit. Arabas verò varias inuississe regiones atq; insulas traiecisse cognitionis ἑργῶ, solus ignorat ipse, qui in ipsorum vitis scriptisq; peregrinus est. Immo vt videas te planè nihil scripsisse; nullum esse medicum pronuncio siue hîc siue aliàs laude vera iuxta atq; eruditione florentem, quin idem quoq; patria aliquãdiu relicta ab alijs nationibus

bus varia ad Medicinam locupletādam
aduexit. At inquis: *Quibus dominascuntur
omnia, non opus habent aliunde cibos impor-
tare, & agricultura contenti viuere queunt.*
Tamen quibus sterilis tantū est regio,
agricultura parū procedente, merca-
turam facere debent, famēq; intestinam
aliunde accersitis alimētis arcere. Quod
verò tuas Academias ciuitatesq; Medi-
corum numero præstantiaq; tam diui-
tes esse scribis, vt ab ijs exteri petant ex-
emplar cognitionis; Id quamuis ego o-
mnium maximè optarē, qui quoq; Lud-
dipolensis sum; res ipsa tamen euincit,
esse falsum. Nam in qua Academiarum
nostrarum, nisi singulis semel decennijs
facta est Anatomia localis? (si verò de vi-
ua illa loquerer Anatomia, quæ tamen
Medicinæ maxima videtur pars, vix me
intelligeres Endymiō) quis Physiologi-
am demonstrat, non opinionis, sed sen-
suum testimonio? quis tyronem ad æ-
gros vnā deducit, atq; illi locū affectum,
affectus speciem, speciei causam, causa-
rum seriem, morbi terminum, trāsplan-
tationem, nexum, gradumq; vero & sin-

cero animo ostendit, ad Hippocratis, Patavinorumq; exemplar? Præterea quænam boni futuri medici spes est, cū primarij illi Regijq; antecessores nullo legant ordine, sed nunc illum, nūc alium libellum arripiāt, & in decem explicandis vel potiùs implicandis aphorismis integrum terāt annum? Hoc cine est docere artē, methodicè legere, tyronem erudire, Medicinam absolvere? Prælectoris medici istæ potiùs videntur partes: ab vtraq; Anatomia incipiendo totam artem tradere discipulis, omnemq; operam in ipsorum quàm citissimam verissimamq; eruditionē conferre. In tuos verò Antesignanos non cadit hæc appellatio. eorum orationes, opera, virtutes, tantam non ferunt molem. Miseret me, ita viuat, lacrymisq; subinde destillantibus doleo Academiarū nostrarum vices: quoties in ipsis nonnullos medicorum studiosos ceu equos quosdam generosissimos in planitiem producendos video: quos tamē si in diaulo videris currentes, aut pauidi, aut sternaces, aut anhelii, aut suffraginosi, aut cernui reperiuntur.

untur. Idq; non tā sua culpa, quā vitio Antecessorū, à quibus pro vnica vera interpretatione infinita doctrinæ vitia, & sciētiæ impedimēta acceperūt. Quāto præstaret, tyronē Medicinæ linguis illis atq; scientijs humanioribus excultū, in ipsa dū ætatis adolescētia Patauinas se Athenas conferre, vbi vnica æstate herbarū pœnē omnium, figuras, synonymas atq; vnius hyemis curriculo cadauerum anatomīā perdiscat. sequenti anno Galenicam physiologiam ab ipsis elemētis ad corporis perfectionem omniumq; actionum plenam enarrationem accuratè lectam perpendat, discatq; illa omnia indicia, quæ vel pathologica, vel ætiologica, vel etiam prognostica dicuntur. Atq; ita biennio feliciter exacto, postea sese lectoribus perpetuum comitem adiungat, ipsorumq; Praxin (id quod facillimè impetrabit) sedulò animaduertat; atq; ita aliorum vel erratis commonefactus, vel prudētia eruditus fructū sibi faciet vberimū: & ex bono Physico, optimus euadet Medicus, & vt ille apud Homerū, πάντων ὑπείροχος ἄλλων. Quod verò

Chemiam attinet, totius Phatmaceutri-
ces medullā vel potiùs animam : quam-
uis à peritissimis nonnullis in tua regio-
ne ita colitur, vt admirationi esse queāt
focordibus & otio veluti tabescentibus
Galenistis : tamen illorum omniū sci-
entia cum exterorum hac in parte peri-
tia cōiuncta tātō minor videbitur, quā-
to Sol Luna maior, aut fontes alueiq; a-
quarum riuulis inde manantibus vberi-
ores. *Verūm* (inquis) *utcumq;* magni facis
Patauium, Basileam, Parisios, Bononiam, Mon-
tem pessulanum, aliasq; *insignes Academias vl-*
tramarinas: hoc unum nihilominus sæpè de-
prehendimus, Diu illic peregrinantes, vacuos
redysse domum, nihilq; *præter futilem & ali-*
quando mendacem rerum hominumq; *histo-*
riam retulisse: alij verò eam apud Italos lasci-
uiam, Germanos ebrietatem, Heluetios rustici-
tatem, Gallos hypocrisin didicerunt, quam in
patriam reuersi nunquam postea deposuerunt.
Atq; *hæc sunt præcipua peregrinorum orna-*
menta, quibus frui sine mali hominis nota, qui-
bus destitui sine bona æstimatione non potes.
Ad quæ ego respondeo, magnā esse pe-
regrinantium varietatem; neq; omnes

vno animo proficisci, nec reuerti cum
 eadem vtilitate. Quare iudicium in pe-
 regrinatione desidero, & illud quidem
 Vlisseum; ne quando cū solis Musis phi-
 losophandum sit medicis, Circæo ali-
 quo poculo in sues atq; *ἀνδρας*, vt poetæ Odyllæ
 verbo vtar, *ἀνθρώπους* cōuertantur. Quod-
 si ab huius ædibus, syrenumq; cantibus
 tyro abstinerit, nec se facile otio sub-
 miserit decipiendum, eaq; duntaxat e-
 gerit, quæ sunt artis non qualis à te de-
 scribitur, sed Hippocrate doctior redi-
 bit, patriamq; ab infinitis morbis ceu
 perniciosissimis corporis proditoribus
 fartam tectam seruabit. surge igitur, En-
 dymion: atq; ocyus recipe te. Noli am-
 plius focarios illos philosophos imitati,
 qui in cubiculo transigunt ætatem, vbi
 neq; compluitur quispiam, neq; sole ad-
 uritur, & musæi sui authores naturæ i-
 ipsius theatro viuæq; adeò voci antefe-
 ferunt. Surge, inquam recollige te. in-
 dustriam adiuuat Deus. & hoc à me da-
 to ignario, peregrinationis studio ma-
 gis magisq; indies conflagra. vel si meo
 nequicquā stimulo commouearis, sal-

tem te Hippocratis, Galeni, Auicennæ quoq; moueat authoritas, qui totius Medicinæ principes cum fuerint, eam tamen in varijs regionibus & ex peregrinis fontibus hauserunt. Pudebat quippe ipsos otij esse quàm scientiæ cupidiores, & eruditionem nō solū laboribus sed quoq; spiritu mercandam existimabant. Quare iam nusquā tutus es, Endymion. A fronte præcipitium, à tergo hostis imminet. si peregrinationem culpes; Galenum damnas, Hippocratem vulneras, occidis Auicennam. si probes; improbas ipse te, & in meas denuò partes quas temerè nimis deseruisti, recurris. Cæterum cū satius sit recurrere quàm malè currere; neque vnquam sera nimis est ad bonos mores via: vel in senectute hac tua fundos vendito, mare conscendito, exteros adito, fornaces ædificato, Chemicam discito, nouam medicinam haud opinione fluctuantem, sed sensibus confirmatam colito. Id nī feceris de te tuique similibus rectè dicetur, quod Martialis olim in pigros nautas conscripsit.

Cessatis